

福建通志

第叁拾捌册  
藝文志





福建藝文志卷六十四

集部二

別集類十

挂劍集福清林古度著石遺室書錄云此本乃漁洋先生所錄康熙甲辰茂之攜其六十年之詩屬漁洋刪定漁洋序以爲少作具江左初唐之體後一變爲幽隱鉤棘之詞今所錄皆辛亥以前之作僅存百數十首施愚山歎真面目始出云蓋漁洋論詩喜清華而惡幽深故云爾也

林茂之賦一卷林古度著李本寧序云茂之賦草九龍灘爲甲余讀之驚心動魄他小賦皆有潘謝之致陳繼儒序云醞釀風華詞鋒景煥

宋比玉遺稿莆田宋珏著漁洋詩話云比玉善八分小詩亦工案比玉明末國子生及交漁洋入諸清

五湖遊稿一卷莆田余懷著石遺室書錄云澹心寄寓江寧此稿僅詩七十首皆遊嘉興之作首有自序一篇稱鴛湖自序又自號寒緘近人



和敬堂文集十六卷詩集二十八卷閩縣黃晉良著吳偉業序云朗伯人  
才清拔其於詩剪刻深秀不愧前人晉良字處安崇禎末諸生號東叟  
井上述古六卷黃晉良著石遺室書錄云是編實詠史詩有自序言始周  
宣王終廉希憲薛鎔序云玉井在丁戊山北百步

米友堂集四卷侯官許友著靜志居詩話云其篇章如俊鶻生駒未可施  
其鞞鞞案友明末廩生錢牧齋吾炙集人選詩一二首獨友選十九首  
許鐵堂詩鈔侯官許秘著張亨甫全集云天玉以詩名令安定流寓臨洮  
卒其遺詩有張晒者官茲土嘗刻之而未備龍溪鄭迪卿觀察出示臨  
洮吳鎮選刻本稍備矣而編校錯陋余乃手錄其尤工者一百五十餘  
首其氣骨沈警聲采壯麗蓋矯然能空依傍摹擬率易幽怪諸習特未  
神妙自得耳周元亮謂其雍土邊塞之作尤工衍石齋記事續稿云天  
玉之詩新城極稱其沈雄孤峭秘崇禎己卯舉人入清官知縣

南窗草存六卷福清薛鎔著石遺室書錄云鎔字子燮一字依南崇禎間



貢生甲寅闖寇起山海交訐鎔以重名却徵辟授徒自給林西仲先生序稱其一代史才抱道高隱凡吾里三四十年間節義軼事有所聞知輒爲傳述卽其他所作序記及交遊往來書牘亦往往撫拾其所聞知反覆揚摧

蘭雪軒集三十卷侯官孫學稼著惕園初稿云集舊爲幼女誤燬僅得手編蘭雪軒詩目一帙佳題滿目凡國初遺老通人天下古蹟勝地強半而在自是旁求二十年會兄子鍾濂辛酉擢第歸解裝出巨帙示余則蘭雪軒集全稿具焉獨原目以體分是彙則以甲子次爲不同而卷帙之數則不異也狂喜叩所從得云從都下友人塾中見童子手是編詢之則乃祖宦閩中購書厨於市得之抽屜內者行閒丹鉛歷碌蓋顧寧人紀伯紫及吾鄉陳子盤曾擬菴諸公所先後論定亟從借鈔且曰今其原稿歸吾鄉一孝廉矣顧其中多闕行間之鍾濂云故帙中多有筆去者意或有所避也未幾鍾濂化去無從叩孝廉爲誰某矣近及門葉



生祐昌從書肆購舊書中夾殘葉視之則君實先生遺筆丹鉛宛在正所謂稿中擘去者其詩與題率大佳他無忌諱不解何以擘去

蘭雪軒詩鈔孫學稼著惕園初稿云聖湖先生集斷自順治十四年絕筆於康熙二十年詩二千餘首未梓懼復散軼乃錄所尤心醉者若干首其逸詩零落人間續拾得者別爲劍合篇先生友高雲客兆許介壽友陳仲桓驟皆老於諸生並有集雲客介壽名在天下仲桓獨不甚顯詩亦未行世而雲客集刻本近亦不易得謹錄所見一二併先生子蔚若起宗詩附於後

檐景齋詩四卷閩縣邵標春著石遺室書錄云標春字是龍又號雙丸適客乙酉送陳克亨謁史道隣申青門二先生詩自注有云甲申秋予從陸岫青侍御提旅勤王與克亨相值建溪故篇中及之又有哭黃石齋師相七律蓋遺老也古詩簡老無枝葉今詩清婉可誦據自序皆斷自甲申以後之作



阮疇生詩同安阮旻錫著魏敬士文集云先生生於閩嘗師事峽江曾公  
櫻曾公死於義先生遂頻年遠游抵吳越達中州涉齊魯燕趙之鄉庚  
申夏先生攜其涉江燕山紀遊詩來訪家大人於翠微因屬家大人序  
其集

天籟集三十卷續集長樂王穎如著道光通志云穎如邑諸生年十三從  
董應舉遊鎮海樓倣王勃滕王閣序詩立就數千言語極壯麗

淳意齋遺稿長汀陳次弓著次弓名未詳託素齋文集云次弓爲人孝弟  
不欺朋友稱詩者數十年又精楷書尺幅寸箋皆可寶重汀邑處萬山  
中文章風氣之開至崇禎年間爲極盛與次弓同時者孝廉若水沈公  
司訓叔衣楊公文學與叔胡公予從父文學振三公皆修文立行發前  
人之所未有特當時無有聲勢氣力者爲之推挽前後故諸先生之遺  
文不大顯於世

冷鷗堂集漳浦趙潛著閩遊詩話云潛一名炎字雙白諸生康熙中僑寓



雲間谷陽門外笏溪上顏其室曰西枝集二册一曰尊客一曰蒞民尊  
客者流寓松江所作也五言如小雨桃花寺東風燕子村養花知月令  
坐雨檢農書七言如孤客晚投紅葉寺一僧寒定白雲樓雅健可喜又  
王鹿阜先生名道亦漳浦人曾爲金山令記其一聯云牆甫及肩山並  
出月方當午客遲眠紀遺云潛句如萬里秋心全在菊一江雁影半隨  
潮繞郭千山紅葉雨緣溪一道白蘋風紅橋綠舫空江路衰柳寒邨野  
獵車小巷風高漁市散荒汀烟破估船開雁影度殘孤嶂雨雞聲啼滿

一江潮並佳案潛順治初廩生

簡齋詩集晉江蔡慶旺著案慶旺字于曾順治二年考授福州府教授遷  
山西屯留令有政聲

蟲吟草詩將樂車耆奎著石遺室書錄二云耆奎字含光蕭深谷集有序云  
內得無子孑然一身詩高老奇邁若昭君怨猛虎行枯魚過河泣野田  
黃雀行諸作二百餘年無此矣耆奎號匏河順治初貢生嘗讀書金溪



著作甚富

東山集二卷莆田林佳璣著蘭陔詩話云衡者少擅詩名有鸚鵡倚籠閒說夢杜鵑對月憶前身之句爲人所傳誦閩亂遊吳越閒與姜如須吳梅村金孝章朱錫鬯定交梅村贈詩云夾漈草荒書滿屋連江人去雁飛田後衡者客死連江人以爲詩識云案號履齋順治閒諸生

湖舫集燕來詩過霞集劍外編鐵蝨詩屏音榕邸詩回雁草海魚編鐵崖詩文集晉江林嗣環著鄧孝威云鐵崖罷瓊海觀察歸僑居西湖自號徹呆子爲風流人士所宗詩多奧異不可讀案嗣環順治己丑進士

韻外集小草堂集侯官謝天樞著閩詩傳云爾元居官有政聲孤介峭直不可屈撓善古文詞渾涵幽雅尤恣於詩案天樞號星源順治辛卯舉人

西莊集寧德崔從著榕城詩話云從十三能詩自號西竺村童古詩摹長吉近體尤纖微憔悴有與雨絕云葉香亂打冷霏霏與夢尋秋雁影



稀烟雨滿溪行不了渡頭扶傘一僧歸舟行云春到江聲埽碧天漁舟不繫入孤烟開窗依舊山無雪水鴨呼寒宿柳邊又寒食五言云晨聲全瘖雨春戀半養烟案從字殿生順治八年歲貢官教授

雁唳篇一卷閩縣葉矯然著注韓居詩話云思庵詩五言取法魏晉七言亦饒有氣力所著龍性堂詩話謂作詩須生中有熟熟中有生又謂作詩高手首在鍊意而格調次之又謂予最喜昌黎長吉義山子瞻四公詩聞有所得輒標識於上其生平命意可見矣案矯然順治壬辰進士

意山堂詩集莆田楊夢鯉著蘭陔詩話云南叟宰青陽羣盜夜劫之挾弓而出射殺數人盜驚駭散去歸田後囊橐蕭然賣文自給詩集散佚僅存五律一帙乃石璞澹崖二長老所輯者案夢鯉順治壬辰進士

紀遊全詩長泰葉先登著注韓居詩話云吳庵所著詩有公車燕臺西征東征南歸倦飛鳥上紫欵生還等稿案先登順治壬辰進士

曹子復詩集閩縣曹夢善著余甸作序云辛卯避暑塔湖精舍數與子復



曹丈游讀其詩氣味在韋柳皇甫冉曾閒曹丈爲雁澤先生嗣

汝南集閩縣鄭燝新著榕城詩話云燝新聞居云閒居何所適開卷有深情水性原宜淡花心故喜晴曠觀雲入定幽夢草初生忽聽簾前鳥聲聲解不平案燝新順治閒辟爲員外郎

蔣克平詩文集閩縣蔣衡著閩詩傳云克平研窮義理發於文章苦心衛道誘造來學案衡順治閒諸生

叢桂堂草閩縣馬良翰著注韓居詩話云卧南善八分篆隸詩亦澹蕩無塵俗氣案良翰順治閒布衣

紫籐花庵詩鈔一卷侯官許遇著注韓居詩話云月溪工松梅竹石受詩於新城王貽上貽上嘗題其畫竹許侯磊落負奇氣平生節目堅蒼筤石林手種竹萬个興來自寫千篔簹子鼎均皆工詩左海文集云許不棄紫籐花庵集從其家索借一卷乃游粵時家山雜憶詩百餘首此外渺不可得滄浪亭游讌之作未由搜訪矣案遇順治閒貢生官知縣友



子

馮餘詩集洪江社集侯官林崇孚著曹學佺序云介山少年豪儁以命世自負其詩韶秀清爽率如其人案字永中順治間以薦官惠州知府

還拙堂詩集侯官劉日章著閩詩傳云君闡性直而行嚴學優而才博精二王筆法詩文深雅諧性情之正案日章順治間諸生

浪谷詩燹侯官林日毅著沈心齋云浪谷詩經營刻苦不屑一語寄人籬下案日毅字君肅順治間諸生續通志以爲其父榮芬著誤

飲綠詩草侯官林中芝著注韓居詩話云紫巖曾孫芳嘗述紫巖讀書道山故人薛桐溪官通政一夕忽相思晨卽命駕遠涉五十餘里旣見旋返其僦儻如此案中芝順治間諸生

甚麼堆詩一卷侯官陳星義著案星義字逸甫隱於縫工力食養母里邨稱之

漁村詩文集四十卷廣伐山集四卷籠鸚集八卷連江陳元登著案元登



字龍淮鶴鳴子以氣節自持工書畫其詩歌古文詞類多感慨

西江日譜二卷永福黃璫著石遺室書錄云璫字基玉號愚長文煥孫卷首又載叔虞稷蓋文煥在南都與虞稷父居中友善又同姓故也自序稱前適豫章往反俱在秋冬之際景愈佳興愈遠日記數語系以詩題曰西江日譜大概詩皆長題百十字直是遊記登滕王閣一首最長至千百字詩頗幽咽上卷爲白白下至章貢下卷由章貢返白白下而末首題稱到家殆以流寓白下故据道光志璫順治閒薦辟官至僉事但以爲文煥子與麟峰黃氏家譜不合

涼亭詩略一卷莆田林堯光著四庫全書總目云堯光字覲伯順治中以選拔貢生官行人司行人近鄭王臣選莆風清籟集謂堯光伯仲詩各臻妙境而堯光尤秀拔當爲馬氏白眉然所作頗涉纖麗於元人蹊徑爲近

松樓集二十二卷西苑集一卷莆田林賓王著蘭陔詩話云穆之送友遊



雲中詩有先朝綺麗三千尸往事淒涼十六州爲人傳誦王阮亭序其集刻之案實王順治閒諸生

白舫詩集二卷莆田郭鳳喈著蘭陔詩話云友日有潔癖愛苦吟古體沈鬱頓挫似元道州近體情景清切似岑嘉州友人張翼汝梓其集以傳案鳳喈順治閒諸生

白桃庵集莆田黃轍著蘭陔詩話云聘侯嘗爲酷吏所誣已赴西市有貴人援之得免其書法出入黃米詩格亦蒼老家轍順治閒諸生

膠膠堂詩集十卷檇軒賦二卷莆田林鳳儀著道光通志云鳳儀字少威號檇軒順治閒諸生與從叔嵒從弟向哲相切劘嘗以詩謁黃道周道周謂嵒有二姪猶王之養矩謝之覽舉也

四近堂集莆田鄭仁質著林少威云季重蒐羅載籍作閩風十首包括總攬有一唱三歎之音案仁質順治閒諸生

醉烟集莆田蘇承武著蘭陔詩話云蘇承武好苦吟務幽僻蓋奉竟陵爲金



科玉律者案承武順治聞諸生

甌離子集十二卷莆田林向哲著道光通志云一作玉巖閣十二卷未知同異向哲字君十詩學杜得其神似後出遊燕薊詩益雄所著作從子楨梓而傳之

問山堂集十卷晉江丁煒著安序堂文鈔云雁水先生筮仕燕豫回翔郎署按節贛南鬱孤之間所歷名山大澤廢壘荒祠與其故鄉珍禽奇樹之觀丹青瑤刻之異皆一一於文發之更工於有韻之章鈍翁錫鬯諸公已序述而揚扞之鈍翁續稿云大篇短章閒見層出訇然如鍾呂之鳴煌然如藻火之麗洵乎其爲詩人之雄也曝書亭集云其詩直者不伉綺者不靡約言之而可思長言之而可歌斯善學唐人者矣魏季子文集云吾讀雁水先生文集見其政事焉白茅堂集云爲文本於天而成於學記序碑志諸作在近代與青田金溪埒他非所及漁洋詩話云丁雁水五言佳句頗多如青山秋後夢黃葉雨中詩鷺啼殘夢後花發



獨吟時花柳看憔悴江山待祓除皆爲可吟案雁水有閩山文集八卷  
閩山詩稿涉江集各一卷順治閒由薦辟起家

何中岳詩文集惠安何中岳著道光通志云中岳順治閒諸生工詩文爲  
理刑王仕雲推重

教忠堂遺稿安溪李兆慶著道光通志云兆慶字賴甫順治閒貢生兄弟  
六人皆力學著聲

晚簾集七卷龍溪陳箴著四庫全書總目云箴字于寶是集文三卷詩四  
卷前三卷分體後一卷則不分體蓋續刻也其古文多雜偶句不古不  
今詩頗澤於古而不能得其格律蓋刻意有爲而限於無師者也託素  
齋文集云績學多聞名滿天下案箴順治閒拔貢官連城教諭

題庭集漳浦侯烜著魏惟度云烜早慧以詩名從乃祖晉水先生令涇江  
舟過鄱陽望廬山有句爲時歎賞案烜字薇卿順治閒神童

土歲莊集南平施中著黃晉良序云延平高士施子雲倩與予爲道義交



別面十載至相與留連晨夕因得讀其詩卷莊全詩孤高絕俗當激  
液盈斗以滋其雋永非世俗之所知也案中順治間諸生

田閒施先生詩施中著蕭深谷序云由延津西上二百里有江村曰吉田  
故明侍御九峰胡先生實生其地所傳黠淡灘猿洞西芹諸作皆近世  
詩人所罕後百餘年而其里人田閒施先生殆欲駕而上之

西湖集將樂王言雅著案言雅字元度順治間諸生少以淹博聞年二十  
餘隨父宦杭州著西湖集行世

雪僧詩稿一卷浦城潘遠著案遠字靜致一字雪生少以詩名老逃於禪  
因號雪僧

五雲居詩集泰寧謝韓著案韓字穉圭順治間諸生嘗收葬畫網巾先生  
王僕遺骸樹碑墓所歲以斗酒隻雞酬之

西湖十詠友聲集長汀王竑著案竑字廣生工詩畫與寧化李世熊江西  
魏禧皆有贈答



幻樓草二卷北山草二卷寧化雷動化著李兆熊序云震敷善爲清夷澹  
渺之音高老近陶次亦幾於王儲韋孟案動化順治間貢生

不借看詩集福安陳王道著案王道字純之順治間貢生時福寧海氛未  
靖學使者欲令士至福州彙試王道呈請云固知禮無往教嘗聞聖亦  
周流學使大加歎賞爲之卽行

浣亭詩略二卷浣亭歸來吟一卷附山蘊花堦長短句一卷莆田林堯華  
著四庫全書總目云堯華字開伯順治甲午舉人官榆次縣知縣浣亭  
詩略皆早年所作歸來吟皆罷官以後所作長短句則附載其詞也其  
詩編次頗爲叢雜如詩略中有詠園花十四首歸來吟中有詠園花四  
首而其中醲醲一首一字不易其詩才氣雋爽早年刻意雕鐫未造渾  
成晚年又頗涉頽唐縱筆太早其詞有南宋格意而罕睹新聲亦擬議  
而未變化

澹亭詩略澹亭偶存莆田林堯英著蘭陔詩話云王阮亭選燕臺十子詩



澹亭與焉其詩藻逸思深體備文質與兄涑亭工力悉敵案堯英字蜚伯順治辛丑進士

頓芙蓉集莆田周韓瑞著蘭陔詩話云退庵宰曲江以治行聞將入覲未行尙逆變起竄伏蠻洞中數載始得還閩所著詩賦十卷雕板已失予購得手錄詩一冊爲釋澹歸所點定者案韓瑞字興仲順治甲午舉人秋容亭集莆田周韓起著蘭陔詩話云莘野善畫竹石自比王孟端吳仲圭求畫者靳勿與性嗜荔子人令販子擔荔過之輒飽噉殆盡索直無以償販子乃出練素求之便忻然揮灑案韓起順治閒諸生

冀北吟一卷雲中吟一卷惠安朱兆綱著案兆綱字長魯順治甲午舉人榜名瑞參知馬邑縣地近雁門墾荒築堡民以安集

十詠樓集順昌何純子著和敬堂集云舍人弱冠以雋文薦高科文光若飛濺乘高散落受其挹注莫不汎溢案字劍客號洞庵順治甲午舉人託素齋文集十卷長汀黎士弘著魏季子文集有序云余讀其文光明俊



偉有千里浩瀚之勢而矩度不失古人嘗私擬之子瞻遂初堂集有序云文章踔厲清矯其氣充以完其詞辨以達詩章一本性情刊落浮華始乃刻畫漸近自然子致遠跋云詩分四卷文分六卷治命行述附後四庫全書總目云士弘字媿曾順治甲午舉人官至陝西布政司參政自序稱少時詩好李賀文好王勃今觀集中諸作大抵多宋人未派絕無一篇與子安長吉相近者蓋嗜好雖篤而才地則與之不近也石遺室書錄云詩文皆卷爲目錄文卷一有周亮工潘耒魏禮三序卷三卷五各有自序詩一卷一自序卷三自序三卷四無卷一又有周亮工及弟士毅兩序自序述豫章陳伯璣爲點次篇章選入國雅且云子詩近乃更喜宋實則古體頗似傅青主近體頗似袁公安先生爲李元仲先生弟子而散文文從字順與元仲不同

聰躬堂文集二十卷晉江王命岳著四庫全書總目云命岳字伯咨號恥古順治乙未進士官至刑科都給事中是集自卷一至卷五爲奏疏卷



六至卷十七爲雜文卷十八爲詩卷十九爲易卷二十  
爲詩牖中天據其自序謂辛卯冬夢文王周公先後車蓋鳴道其盛命  
岳自牖中窺視故以名也其書分十二篇大旨謂易雜卦無錯簡而以  
互卦之法推求其義讀詩凡五十條皆標識簡端之語一篇或止一兩  
句如讀簡兮曰使我懷古之情更深讀王風曰大車之淫甚于丘麻丘  
麻淫人大車淫鬼尤非說經之正軌也

文軒詩集南安洪士銘著道光通志云華亭田茂遇謂其詩鳴珂擗笏之  
容振玉撻金之奏董俞謂其才情爛漫泉湧雲興殆將伐靈鼉之鼓撞  
萬石之鐘非僅調笙摘阮操一音以悅耳也案士銘號畏軒承疇子順  
治乙未進士

月將堂近草涉筆園稿閩縣王國璽著改亭集有序云丙午冬予留京師  
與閩縣同年王爾玉數數往返論詩王子筮仕得邑令以詩自娛予盡  
讀之寄託深厚而亦不陋於聲華指歸悽惻而亦不譎於格律石遺室



書錄云改亭序作王爾玉西堂雜俎同而全閩詩錄續集云國璽字介玉號海印順治丁酉舉人官景州知州介必爾字傳寫之誤爾古字作尔與介形近也改亭亦丁酉舉人故稱同年

江城鳴草福寧游龍著道光通志云龍順治丁酉舉人致仕後卜築南陽足跡不履城市

韓文起十二卷閩縣林雲銘評注案康熙癸酉雲銘自序附凡例一卷韓文公年譜一卷雲銘順治十五年進士

抱奎樓文集十二卷林雲銘著四庫全書總目云耿精忠之叛雲銘方家居抗不從賊被囚十八月會王師破閩始得釋然學問則頗爲身陋所評注選刻大抵用時藝之法不能得古文之源本故集中諸文亦皆不入格云

吳山穀音八卷林雲銘著安序堂文鈔云西仲向有損齋焚餘文集流布藝林一洗近世膚廓纖媚之習比年僑居虎林復彙其書序記傳諸作



名曰蠶音原本于荜比于羽族之微以自傷其播落四庫全書總目云  
据自序云分爲四卷而書實八卷或刻時每卷分而爲二歟

霞園詩集三卷文集一卷建安鄭重著四庫全書總目云重字山公順治  
戊戌進士官至刑部左侍郎是集詩三卷第一卷令清江時作第二卷  
爲越使吟祭告會稽南鎮時作第三卷爲秦遊草典試陝西時作又雜  
文一卷考重典試陝西在康熙十七年戊午使越祭告在康熙二十三  
年甲子今反錄越使吟於秦遊草之前殆編次者誤歟

懷古堂集福清楊獻策著道光通志云獻策字文子順治庚子副貢生性  
嚴毅力學砥行一時從遊者最盛

古愚心言八卷莆田彭鵬著四庫全書總目云鵬字奮斯順治庚子舉人  
康熙甲寅耿精忠叛逼脅受職凡九拒僞命賊平後授三河縣知縣後  
官至廣東巡撫其生平以氣節著故集中多誓神之文其他奏疏案牘  
亦皆辭氣侃侃無所撓屈官三河時與妻子書皆以清苦刻厲相勉足



以見其爲人其他詩文則率臆而成字句皆不入格矣

乙丑渡江草彭鵬著莆陽文輯引自序云回首二十六年來錢塘揚子不記幾度渡江書乙丑紀年也書乙丑而仍渡江傷遲暮也遲暮何以有草人老而壯文老而勁此一渡也如破釜沈船以示必濟雖言言皆實信手得四十餘篇皆繫以渡江不忘擊楫時爾

定齋集莆田鄭泰樞著蘭陔詩話云從祖定齋襟韻灑落不耐真事求改廣文署內建賦楸閣日夕吟哦其中又嘗割俸建化劍閣於劍浦上祀張華雷煥及煥子華案泰樞順治辛丑進士

響草德化李道泰著自序云樵兒牧豎山深不厭磴絕無人箕踞松石嘯歌自得上應吟猿下聞流水聲發谷和如相酬唱豈必清謳雲遏郊彈鐵躍哉夫牛嶺鸞嘯巖下方聞山水移情海上撫弄是編不可以方或手攜囊杖履深山芳樹葉下深淵花流開囊翻帙高呼疾唱飛鳥徘徊必無耳目予者當令眾山皆響案道泰順治辛丑進士



贖園四草李道泰著自序云予既自序響草已與梨棗爲仇况此四草又歌哭之餘免糜之贖尙焉用敘世人歌詠欲以敘存余歌詠欲使人見敘知不欲存如垢面人常思握鏡人嗤吾醜吾亦自嗤吾醜而已日枯草如樵牧山行撚指皆是小童坐鬪信手無嫌日拙草如石齷尉搗粥雖欺王公僅僕知爲陳宿如厭人物見必叱咤日訥草如村火頭強下轉語口結舌彊日塊草則聲淚之窮筆以代哭者此四草意也庚子秋中書於飲光堂

修水草李道泰著自序云已酉束裝修水知匡廬在望稍愜素懷乃舟車之瘁既同彭澤塵足之苦不第折腰我勞如何徒勤清夢

雲龕遺稿一卷長樂梁春暉著四庫全書總目云春暉字時皇號淑三考淳熙三山志雲龕山卽龍龕山在長樂縣南千溪潭上有歸雲洞望海亭香爐峰諸勝春暉晚年卜居其地以吟咏自娛故以名集此本乃雍正癸卯其孫澄漪所錄未有澄漪跋稱初名雲龕吟稿嘗謀鈔板而力



未逮藏弄久不幸爲蟲鼠所戕剝蝕斷爛至不可讀細加檢錄得其首尾完具者僅十之一二

蘇綺堂詩集十五卷文集五卷別集六卷後集二卷

一作陽谷詩文集

南安傅爲

霖著海村集云石漪手哀所著詩若干首屬其友趙雙白魏惟度請余言并簡端石漪原本家學好與郡之先達者游其爲詩也於體制風格既講求漸漬之有素又能標舉蘊藉剪刻深至以自探性情之所獨得注韓居詩話云石漪以英年世胄爲雲間通守政治之餘留心風雅嘗重梓先世大魁錦泉先生遺編行於世案爲霖字世揚由海上納款

璞溪詩集一卷南安梁興玉著案興玉字日振少依鄭成功及臺灣平遂隱不仕

潛山樓詩文集德化林朝薦著案朝薦與弟朝陞結廬潛山相爲唱和寧陽詩鈔慎餘堂詩文集寧化陰燮理著案燮理字寅賓順治康熙間一寇竊發燮理上六議當事多用之嘗師寧都魏禮以居親喪哀毀卒



平治莊集閩中吳彥芳著唐堂集有序云蘇州流寓有閩吳香爲先生諱  
彥芳者順康閒人以進士起家坐事罷官寓吳好爲詩古文有平治莊  
集

鵬怨集閩中倪氏著婦人集載其本序云丙子爲閩中巨族依其舅氏于  
白門孟夏歸余一病不起客有善李少君術者爲余招丙子魂叩生前  
事歷歷如響復作詩十數章有云已作靡蕪離恨草莫看菡萏並頭蓮  
雪園詩集六卷長樂梁珪著四庫全書總目云珪字至鉉號雪園是集前  
有其友袁奐序作於康熙甲辰其詩凡分六集一曰靈峰草二曰江南  
遊草三曰循陔草四曰楚遊草五曰江西遊草六曰恆山遊草惟靈峰  
循陔二草爲居家奉母時所作餘皆其客遊南北登覽山川之作也  
遊吟詩閩縣陳瀉潢著林白雲云悟山值耿變竄不應召事平撫軍吳廉  
其名任興平令詳豁浮糧民懷其惠案瀉潢康熙丙午舉人

慎修堂詩集八卷將樂廖騰燧著蕭深谷文集作浴雲樓詩云宏音亮節



無寒瘦卑靡之習四庫全書總目云騰烽字占五號蓮山康熙己酉舉人官至戶部侍郎其服官頗著清節詩則尙未成家

松鶴堂集十六卷侯官陳夢雷著王挾序云茲集平日宴遊寫懷述事與夫揚榷古今衡論人物之作俱在其詞宏博奧衍疏暢旁達而於君臣朋友之際憤激而不怒怨悲而不傷案夢雷作怒而傷者多矣

閑止書屋集鈔二卷陳夢雷著石遺室書錄云卷一文卷二詩卷一中告城隍一文絕交一書皆詳述李光地蠟丸冒功落井不援之事最甚者謂光地杖策來見耿精忠夢雷力責其非勸其歸去光地尙欲受一廣文以歸亦可謂不值一錢矣然夢雷自言脅以僞官就拘而行以徐元直王維自比所謂不跪不朝賀者亦出於自言此則較崔立甘露碑之獄尤難聽直者矣課餘續錄云省齋集世少傳本此嘉慶甲子其七世姪孫佐衡所錄首卷皆進呈文字不入數雖曰二卷實三卷也並其僕楊昭跋並載此集黃鶯來序云詩文憂愁拂鬱浩氣奔泄如疾風寒迅



金鐵皆飛又如深巖流泉鳴聲幽咽先生著作卷帙繁富是刻所登不過十之一二

天一道人集一百卷日省堂詩文集一卷陳夢雷著道光通志云詩二十四首頌十二首皆翰林應制之作

玉巖詩集七卷莆田林麟焜著四庫全書總目云麟焜字石來康熙庚戌進士官至貴州提學僉事其詩法受自王士禛初官中書舍人時嘗偕檢討汪楫奉使琉球途中唱酬甚夥是編凡前集二卷皆初年所作又星槎草一卷中山竹枝詞五十首爲一卷皆出使時所作郊居集一卷則官提學後家居時作也自中山竹枝詞以前皆載士禛評點竹枝詞後又以當時同人贈別之作附焉

玉巖詩選二卷林麟焜著漁洋文集云石來少以詩有聲閩中弱冠上京師取進士高第幾入館閣之選已乃屢以才望推擇爲中書舍人傑直禁中旬日休沐閒偕二三同志遞相倡和君之詩溫潤縝密李尹旁達



六疎而直上今次其集爲二卷凡古近體詩若干首成一家之言

榕村集四十卷安溪李光地著穆堂初稿云論道釋經之作流布海內惟詩古文未有別集嗣孫侍講清植始彙而刻之四庫全書總目云是集惟詩下注自選字則餘皆清植排纂也凡觀瀾錄一卷經書筆記讀書筆錄其一卷春秋大義春秋隨筆其一卷尙書句讀一卷周官筆記一卷初夏錄二卷尊朱要旨續紀其一卷象數拾遺景行摘篇附記其一卷文二十五卷詩五卷賦一卷所注諸書及語錄刊本別行者不與焉其不以詩文冠集而冠以劄記者光地所長在於理學經術文章非所究心然卽以文章而論亦大抵宏深肅括不雕琢而自工蓋有物之言固與鞞悅悅目者異矣數十年來屹然爲儒林巨擘實以學問勝不以詞華勝也案光地康熙九年進士

况亭詩集龍巖曾應灼著黃晉良序云俊心有深遠慷慨之音別時贈予詩有浮雲東望中原色落日西懸萬里愁之句案應灼康熙初貢生



箕山文集十二卷寧化張其恂著雷鉉撰行略云先生嘗從遊易堂魏季子之門黎媿曾稱其文得易堂家法案其恂康熙間諸生

竺隱詩鈔張其恂著自序云竺隱者余私居也因以名集案字孺子一字箕山

陳昌箕文集南平陳昌箕著案佚其名田閒文集云今客劍津陳子昌箕出其未刻諸稿屬予點定予讀之蒼蒼莽莽一往奔赴讀幾不可斷芳澤雜糅古翠斑剝雖一篇瑜不掩瑕然氣力渾成不屑屑以修飾銀鍊爲專

葉根堂全集閩中毛文山著西河合集云周侍郎櫟園每稱文山爲五言長城宛平王文貞之五言古詩太倉吳學士之歌行中原彭禹峰方伯之七言律與文山五律可以頡頏閒嘗讀侍郎所摘文山五字句而慕之今文山合輯其序記賦頌彙爲一集案文山名佚

晚笑堂詩集長汀上官周著道光通志云周字文佐號竹庄工詩尤精於



畫與黎士宏查慎行交善

霽雲堂詩葛亭草二集漳浦陳祖虞著張若化序云子篤從予子士楷游雖遭坎壈而託想塵外其胸懷與雪梅爭芬比潔詩亦肖似注韓居詩話云霽雲潛心程朱之學家貧嘯歌自樂齧庵蕭公墓其名延爲子師時耿藩叛欲延誘之遂逃之江中宿象鼻庵其節義屹然可想矣

文集鈔遯園草怡老編出門吟悔齋詩集平和李贊元著榕城詩話云贊元春日象山山莊云羣峰當戶牖積翠落庭陰不入此中路安知物外心石橋通澗細烟火傍山深爲語武陵叟桃源尙可尋案贊元字匡侯又字素園康熙初累官察議

華陽詩集九峰上下集魚倉集福寧鄭承祉著道光舊志云承祉嘗築室北山得一石有魚倉字因以名集案承祉康熙辛酉舉人

北遊小草莆田吳轍著蘭陔詩話云易庵父貢士當世慕蘇老泉之爲人名其子長曰軾次日轍父子爲文力穡三蘇句製字度不踰尺寸易庵



矢詩不多亦倣樂城案轍康熙壬戌進士

雪爪集心宗集約墅文集閩漳詩海澄李基益著道光通志云基益康熙甲子舉人九歲善屬文解聲律遂以詩名

滄霞詩集晉江丁焯著高言集云焯詩高深淡遠冶秀空靈藻采運以精心奇氣潤以幽思未可測以一意限以一格兄焯序云韜汝於詩諸體五言好三謝七古歌行好杜與李閒及蘇黃近體好高岑王李出入劉許閒與予所好約略不甚相遠案焯康熙丁卯副貢生

天潮閣集六卷

道光志作十二卷

上杭劉坊著石遺室書錄云卷首序傳年譜卷

一文鈔卷二以下皆詩鈔卷六末詩餘坊字鼈石生於雲南永昌實順治十五年身丁國難家族殉焉浪遊四方不仕不娶亦可悲矣此集初刊於康熙閒再刊於乾嘉閒近人上杭邱復又爲重印並補年譜前有李世熊序推挹其詩甚至

南湖集五十卷侯官鄭磊著道光通志云磊字三石康熙己巳貢生性豪



宕善草書詩疏爽無塵韻

瓊光集三卷莆田方鴻著託素齋文集云翊霄名家子康熙乙丑選拔令下以高等貢入成均大司成較諸貢士命題賦石鼓翊霄立就千言日纔中大司成與從官讀之色動恨得生晚明日名大噪長安秋試見落翊霄賦感遇詩三十首跨驢出都門輦下貴人交相歎惜爭具衣裝又作爲詩歌以送其歸案後數年庚午舉於鄉

陶詩箋五卷上杭邱嘉穗著四庫全書總目云是編乃所注陶潛集摸索語氣全類時文批語其力辨潛不信佛爲能崇正學遠異端尤爲拘滯潛之可重在於人品志節其不入白蓮社特蕭散性成不耐禪儀拘束非有儒佛門戶在其意中也嘉穗刻意講學故以潛不入慧遠之社爲千古第一大事不知唐以前人正不以是論賢否耳案嘉穗康熙庚午

舉人

東山草堂文集二十卷詩集八卷續集一卷邱嘉穗著黎士宏序云邱子



秀瑞年甚少勇於爲文蓋斤斤乎欲其至而又惟恐其不至也

竹村詩集梅花詩武夷遊草楚游草南遊草水雲草侯官王九徵著子勅  
跋云先君子自乙巳迄甲午五十年間得詩二千餘首其成於名山大  
川所閱歷者什居四五因依年次鈔錄爲一集時乾隆戊午仲冬案九  
徵康熙閒諸生

鹿溪草閩縣洪斌著注韓居詩話云簡民閩中佳士曾有書卷氣結而不  
得舒甲寅耿變投筆仗劍東泛海北之邊取功名如反掌亦云傑矣詩  
極雄壯案斌號方崖康熙閒參將

塔江樓文集侯官林涵春著林雲銘序云奕善亂後播遷流離貧不自存  
茲夏爾足仙霞晤余於杭邸以所著古文詞屬序其一往無前之氣如  
怒浪奔流不可阻禦而平日困厄無聊不合流俗之況亦往往借題抒  
寫感慨淋漓案字雲林

塔江樓文二集林涵春著翁葉峻序云雲林先生窮士也胸次磊落故動



與物忤爲文章自成機杼不寄人籬下

晚香堂集十一卷侯官張崙著林從直序云先生古作參李而近體似杜變化出入無一語非杜終不擬杜半字此善學杜者注韓居詩話云文園七律音節高爽是宋調之佳者案崙號蒼嶠官淮安中河通判

海外狂吟草侯官陳昂著赤嵌筆談云軒年富才藻尤工駢儷少日爲仇家告訐謫戍山左康熙末年遇赦歸里縱遊海上多感慨弔古之作案昂康熙閒諸生

對山樓詩集侯官葛經邦著道光通志云經邦字允莊工詩與王九徵陳範相唱和康熙閒貢生

自鳴集侯官林文烜著注韓居詩話云素園喜詩酒精篆刻習岐黃星卜之學案文烜康熙閒布衣

采飲集十卷侯官藍鏈著閩遊詩話云公漪爲人磊落有奇氣詩亦如之畫居逸品生平足跡半天下年逾七十沒于廣州查初白編修遊粵時



與倡和甚相得漣康熙開布衣

時一吟詩四卷古田黎耿然著四庫全書總目云耿然字介菴久困諸生乃棄而從軍積功至雲南總兵官詩皆率意而成殊不入格

楚遊集古田余天民著天民尙氣節耿藩之變脅以僞職不受客湖廣戎幕三年無所遇歸築浴梅書屋藏書數千卷吟誦以終

棠園詩草古田陸鴻著鴻字儀可康熙間諸生博學洽聞文有奇氣詩亦洒然出塵

問青集古田郭如璧著如璧字書府康熙間貢生與弟如奎以文章相砥礪嘗結里中詩人爲六友社六友者宋聚奎鍾鏞趙復昌黃道光趙時昇也

米山集古田曾元蔭著元蔭字首玉康熙間貢生家饒園林之勝日與騷人韻士吟咏其閒兼工畫

剡山園集卽一樓草古田朱蓋著蓋字彥伯康熙間諸生與林日詔林總



護陳懋威丁先聘師事林喬材皆以詩名

貽堂集三卷古田陳琮著古田志作貽書堂集琮字季璧諸生工詩古文詞同時陳蕙芳陳漢高廷耀姜奉世陳紹馨翁維炎皆其詩友以上六人見道光通志

酬弧集莆田林弁著冒巢民云洪山詩如天人無味之糧如山海移情之景案昇字洪山康熙間官揚州通判擢鞏昌同知

梅麓軒詩集莆田黃帝臣著蘭陔詩話云憶趨七言如半空鵝陣疑雲影一徑松濤作雨聲愛閒未免詩添累助興從來酒有功老至情如棋欲罷靜來神似夢初醒皆步趨陸放翁者也案字敬卓康熙間諸生

藥莊詩集莆田康琨著蘭陔詩話云藥莊早年不娶晚寓其友林亦山山茶閣中棲心妙域注念丹經有白蝙蝠一雙大如團扇巢於戶間所作天仙百詠多出世語自知逝日遍別友人案字子玉康熙間布衣

圯上吟莆田蘇嶠著全園詩錄云嶠號依巖康熙間人仕履未詳鄧孝威



云圯上爲子房過老人進履之地余曾驅馬過其處行道匆匆未獲瀾  
覽其勝依巖蘇使君以行河駐此山川在眼古事填胸輒爲揮毫動見  
名卓如與秦漢古名人將相悲歌慷慨於風沙灌莽間可謂河嶽情高  
星斗氣壯者矣

一脈言詩集莆田賀梁著注韓居詩話云燕壘成功子本河內人成功授  
福建驃騎將軍因留居焉遊齊魯燕趙閒福建將軍吳公墓其賢延爲  
上客大叅林麟煇老隱北村日同觴詠嘗贈以詩云鴉青染紙頻揮墨  
蟻綠浮缸數舉杯莫歎沈郎清瘦甚幽香相伴有寒梅案字建瓌康熙  
閒布衣

環山詩草莆田宋慶曾著蘭陔詩話云魯齋工選體精楷書與姚萍蹤黃  
槐野友善萍蹤贈詩有詩接東西晉書摹大小王之句案慶曾康熙閒  
貢生

何禮康詩文集晉江何琦著道光通志云琦字禮康居粵西劉仙巖不知



所終

潯江草五卷南堂集二十卷晉江施世綸著蓮坡詩話云南堂先生歷官  
漕督清名聞天下南堂詩鈔如璞玉輝春蠙珠浴月琅然可誦尤工五  
言詩中有愛山移舫對隔水問花多岸火潛魚躍沙更宿鳥飛看雲生  
礪戶聽雨過經樓孤樓侵海角銅柱出天涯飛花懸隙網行雀上空階  
風塵雖近市心跡喜多閒海氣連吳越秋聲入鼓鼙水氣涼疑雨松聲  
瀉似濤等句擬之姚少監鄭都官當不愧也案世綸煨子

鄭子俊詩集晉江鄭希文著希文字子俊康熙閒拔貢生與黃俊字子干  
李某字子壽林某字子政宋澤溥字子泉黃道泰字子寅稱六才子

雪舟詩集二卷晉江黃夢琳著夢琳字球卿康熙閒諸生少得吳喬詩法  
古今體彷彿中晚唐

頤園詩草晉江林逢春著逢春康熙閒員外所著有西征宦游進思退思  
等集以上三人見道光通志



樓軒集一卷倦游草霜鬢吟一卷晉江林泉著汪韓居詩話云雲谷善四聲工篆隸小楷得鍾王法

容齋集晉江黃僧岸著石遺室書錄云僧岸佚其名田閒文集有容齋集序道光通志康熙閒有容齋詩文集晉江黃中炎著未知卽其人否

傅井公詩集南安傅樸著府志引高言集云其詩境在幽淡閒

許含之詩文集同安許其鏐著高言集云字含之田茂遇謂其詩縱橫自如不囿於境

躬行堂詩文集同安周奇炤著康熙閒諸生淹貫經史晚年肆力於詩文愧雅軒詩集鶴崖後稿同安陳皋著皋字子偉康熙閒諸生博學工詩古文詞及書法

遠廡近吟選同安鄭得瀟著得瀟康熙閒諸生沈酣經史年九十餘手不釋卷以上三人見道光通志

臯軒文編一卷安溪李光坡著四庫全書總目云是集凡文二十篇皆發



擇性理闡明經義之作其論學主程朱論禮主鄭氏論易則宗邵子而兼取揚雄太玄以爲僭經雖有罪而存易則有功然必以太極先天二圖爲不出自陳搏則未免回護之見晁以道作李之才傳序述源流至爲明白同時之人當非無據非朱震一人之私言也案光坡康熙閒貢生

穉谷外編三卷安溪黃元高著道光通志云字穉谷康熙閒諸生工詩古文及駢體

嚴野航詩碧梧菴詩集龍溪嚴仙藜著張亨甫全集云龍溪鄭雲麓觀察出其州人嚴太乙詩集屬爲選定因汰其三之二存二百餘首太乙康熙閒諸生其詩芳情冷韻時出苦思以自矜鍊抑亦才士也道光通志云以詩稱畫筆蕭疏亦能作花卉

舍南集推袁集拱戟集龍溪袁庭著庭字子楚所著舍南集多變徵之音其後著推袁集不離慷慨激昂本色晚著拱戟集一變而爲沖和恬適



得風人深趣

東園外篇龍溪趙霖著霖爲南洲老宿以貢生終鄭亦鄒稱其文如煨金於治漚苧於流以上二人見道光通志

林元白詩詔安林元白著名未詳鹿洲初集云南詔林元白先生老於詩者也少慕微之樂天因自字曰元白集成卽以名編吾鄉前朝侍御李寶弓先生及今太史蔡梁村爲之序

後知堂文集四十四卷將樂蕭正模著石遺室書錄云又名蕭深谷文集正模號深谷也同鄉中與余不遠思復車瓠阿耆奎徐南史章貞吳彤雲口彩林吉人佶鄧未有拔萃爲至友外省則錢田閒秉鏡戴田有名世輩史論筆力簡老各體文皆簡峭詩古朴中亦復宕逸頗似謝皋羽

本附錄二卷馮柱雄云余中村極喜深谷文字或問其佳處中村曰簡今讀其文汪汙干頤而詮理敘事必中於成法始歎中村知言而黃貞父之以簡核定震川有以也案正模康熙閒拔貢生官教諭



妄寔篇蕭正模著自序云壬午秋余見放復以官事羈三山北歸至郡又有亡兒之痛雲開張北山挾子姪來吾延求道學之書因與盤桓僧舍流連古蹟凡一月得文若干首詩若干首或曰子之哀甚矣古有悲不欣聲者子文何若是富也余曰是予之妄以塞予悲也夫長歌當哭遠望當歸余之揚揚其外者非戚戚其中之甚者乎言及此雖塞鳥從塞也

中郵逸稿余不遠游草將樂余思復著石遺室書錄云思復字不遠號中郵蕭深谷集有序田閒集有游草序云余子曾識予於沙縣出其所作詩相示調苦而意深蓋甚不得志於時者之所爲也予謂余子宜以出遊余子辭以親在未能也予爲作余不遠字說贈之而別別二年余子親歿既葬乃由豫章下蕪湖溯流訪予樅陽之北山樓不遇留詩而去今秋訪我於田閒出其遊草其力益堅其法益老其氣益厚其調益古似齋集卧廬逸稿泰寧江六瑞著道光通志云六瑞字首山康熙間以貢



入京和碩康親王雅慕其名將薦於朝辭不就歸以詩文自娛

青山別墅藏稿建寧謝國樞著榕城詩話云在紫五言詩有草荒蕭寺路  
人倚夕陽樓七言有天空晴送羣峰翠野曠寒生落葉愁句案國樞康  
熙間貢生

香谷集建寧袁一先著閒居錄云一先字我峰家藏雙石一黃一白玲瓏  
皺瘦尺體具華嶽勢袁嘗作雙石賦及歿雙石亦枯稿惟倅二年乃復  
光輝案一先康熙間貢生

灑園集長泰歸來集光澤曾益著道光通志云字子謙號牧庵讀書洞光  
巖十年不入城市康熙間以貢生任長泰訓導遷教諭

蛟湖詩鈔四卷寧化黃慎著石遺室書錄云此本爲其邑人雷壽彭重印  
前有雷鎔王步青馬榮祖三序許齊卓一小傳樂府五七古凡數不羣  
頗似傅青主鄜海雪許傳言山人不重惜其書常自矜其詩長篇短什  
樂以示人馬序稱五律尤清脆可喜實則七言絕句亦甚似元人之學



晚唐者雷鉉序云余同里有瘦瓢山人好山水耽詠善畫工書其詩如  
巖巖絕巘烟凝靄積總非凡境其字亦如疎影橫斜蒼藤盤結然則謂  
山人詩中有畫也可字中有畫也可道光通志作三卷閩汀文選作  
落英集慎字恭壽

焦桐集寧化伊元復著道光通志云字順行康熙閒諸生巡撫張伯行以  
博學宏詞薦以疾辭

池上集二卷寧化黎棟著黎士弘題詞云于鄭遭逢數奇因人遠游泛大  
江望廬阜登采石過北固下姑蘇問交于先生長者何怪風期之日上  
乎

影廬詩稿一卷寧化伍有俶著張其恂序云伍子之詩如荆卿之歌漸離  
之筑越石之嘯聞者驚神動魄案有俶康熙閒諸生

陳香初詩石遺室書錄云香初閩縣義溪人佚其名賴古堂集有序稱其  
清婉而幼眇



芝壇集二卷連城張鵬翼著四庫全書總目云其詩文皆以講學爲宗體格多近於語錄案鵬翼康熙閒貢生

童君重遺言連城童三綱著道光通志云三綱字君重康熙閒貢生博洽工文詞邑中碑記文多出其手

愛連堂詩文集連城林霞起著經筵堂文鈔云林赤章先生字淑齋與童玉欽李崑峰董若水四人號四愚構四愚亭於冠豸山中案霞起康熙閒貢生

遙集草窠草楚游草連城賴啓英著啓英康熙閒貢生才識高遠所著疑論卓然成一家言詩亦瀟灑不俗

學山樓詩稿永定熊龍箕著龍箕字毓水康熙閒貢生愛溪山清美構學山樓課子姪於其中爲詩清壯秀傑

怡情小阜福寧王鍊著鍊字聲公康熙閒諸生幼諳音韻長通經史尤工詩與從兄鎔鑿倡和不倦年八十卒



秋園八詠寧德張國鎮著國鎮字亦韻康熙閒歲貢生慕陶徵君爲人性喜菊每花時與兄國鐸吟成菊譜以上四人見道光通志

松址文集三十卷長樂林豫吉著陳瓊序云先生旣釋褐之二年遽罹飛語構陷竟下於理聞斯集皆獄中揮毫伸紙而就此與屈平被放作離騷經司馬腐刑成史記又何前後出一轍也注韓居詩話云松址挾智任術明律令登第後未謁選家居與不協者舞文中傷之反爲所持被讒案據詩話則陳序所云未爲聽直矣豫吉字不飛康熙甲戌進士

林松址詩集三卷林豫吉著石遺室書錄云卷首有松址屏山草堂自記云律詩以少陵爲宗古詩以十九首爲宗顏謝之五言直可不作忍眉逐唐人七言歌行諸體哉故少年所作七言古悉付一炬後之傳者惟五言古詩與五七言近體此株守明人何李等之說也能免優孟衣冠誦哉其言文章能從經學出卽小品雜說一二謔筆亦有關世教則亦論矣



江村集建寧何梅著閩遊詩話云梅字雪芳康熙丙子舉人有句云竹溪斜見塔寺近靜聞鐘雪芳一目稍斜而上視其僕重聽各細聲時人因摘此二語爲歡笑官建陽教諭朝天橋側謝疊山先生賣卜處也雪芳爲立碑表之賦卜肆行

无悶堂文集六卷詩集七卷侯官張遠著石遺室書錄云遠字超然詩文均稱无悶堂集各有首卷首行不標明其爲文爲詩文集首有自序一屬大均序一諸體文均雅潔不染明人末派以弔詭字句爲能詩五古多學韓近人鄭子尹作極與相似哭母下建溪諸灘最佳七古參以太白才筆興象足以軼長水而跨新城五言律次之七言律又次之四庫全書作超然詩集八卷總自云官祿豐縣知縣與蕭山張遠同姓名而其生稍後是集諸詩多近元白長慶體在晉安詩派之中自爲別調榕城詩話曰張遠領康熙己卯鄉薦第一游京師與竹垞初白諸人倡和甚富初嘗挾策游四方未有所遇登滕王閣題詩一達官嗟賞爲之延



響詩各遂拔其咏松濤有月明何處雨風定數聲鐘亦佳句也然若滕  
王閣詩豈無詞賦驚閭帥稱閭公爲閭帥却是疵句

宛舫居文集莆田林源著緝齋文集云太僕寺卿學川林公自詩歌古文  
而外若師曾廣義家訓等篇思深慮詳與顏氏涑水呂氏諸訓並傳矣  
案字奕逢康熙己卯舉人

樸學齋集十卷侯官林佶著潘耒序云林子吉人負笈來吳從汪鈍翁遊  
講古文之法復之都門與諸賢公卿豪雋之士上下其議論其文詞清  
醇典雅矩矱有餘四庫全書總目云茲集古體詩三卷今體詩七卷淵  
源有自故體格猶爲近古特才分差弱出手微易耳案佶康熙三十八  
年舉人

秋江詩集六卷永福黃任著四庫全書總目云任字莘田康熙壬午舉人  
官至四會縣知縣榕城詩話稱其詩源出溫李往往刻露清新別深懷  
抱如揚花絕句云到底不知離別苦後身還去作浮萍春日雜思云夕



陽大是無情物又送牆東一日春所爲緣情綺靡殆於近之而低徊宛轉亦或闌入小詞大致古體不如今體大篇又不如小詩故榕城詩話獨稱其七絕蓋才分各有所長云

秋江集注六卷長樂王元麟著石遺室書錄云此集與香草齋詩小有出入香草齋每卷較多數首香草齋注太簡出處多不載書名此注較詳如注月鹿夫人引香草齋詩話注曾脫春衫典幾干引金石錄後序上標明李易安所作注爲照張家燕子樓引薩天錫詩皆遠勝陳注處惟往往引詩話云云不載是何詩話與陳注同病

秋江集箋注閩縣葉夢苓著耕村姑留稿云松根先生初以壬午鄉科隨莘田翁重宴適擇爲外孫女婿故常得親承謦欬追陪觴詠且當時余實岡中丞早相期爲黃集箋注先生因而搜羅採摭之

香草齋集六卷黃任著傅玉露序云余交莘田垂三十載旣稔其爲人而尤篤嗜其詩嘗手鈔其香草箋凡三數過流沫手胝竊比於靖節飲酒



聊命故人書之之義蓋莘田生平所爲詩最初爲十研軒既而有秋江集最後曰香草齋香草者沅澧瀟湘之產以之喻美人者也

香草齋詩注六卷永福陳應魁著石遺室書錄云詩九百六十餘首而七言絕句居六百餘首爲古今所無蓋專學義山牧之飛卿東坡諸家俊逸處故杭大宗以爲最工絕句袁隨園以爲唐代詩原中晚佳也然先生人品高潔五古實有近王孟與常建劉春虛者詩中所用典實無甚僻奧注頗簡明但時有不載書名雖因艱於剞劂求省字數然終是注家一疵病如引李易安金石錄後序中閒省節處忽有與妻李易安等語所引書有單稱詩話不知爲誰某之詩話者注臺城詩不知臺城應教人爲李長吉句皆其疎舛處

塞上吟歲寒堂集閩縣范俊著閩詩選云先生詩蒼鬱雅鍊在隨州丁卯之閒案俊字書升號虞門康熙癸未武進士官陝西宜君營叅將

說餘篇南安王之珂著道光通志云之珂字爾階號鶴汀康熙己酉舉人



寄籍安溪工詩精韻學

且暇吟福安吳瑞馬著蔡世遠序云長溪吳公象真令棗陽奉委入京十八年之契闊相見甚歡以近詠屬序夫詩以道性情君之性情則既優游夷愉矣誦詩所以通政事君之治棗陽清節惠心則既歷有政績矣讀君之詩有初盛之諧聲無中晚之促節案瑞馬康熙丙戌進士

警齋詩集侯官宋道策著注韓居詩話云自康熙戊子迄乾隆癸亥詩千餘首溫厚和平無劍拔弩張之態

醉墨堂詩稿莆田鄭亮光著莆風清韻集云徐達夫云寅士才情爛漫醉後作詩未嘗停筆皆自胸臆中流出符劾魯云清婉和粹出於自然案號同溪康熙戊子舉人

黃元杜文集邵武縣黃符著一布堂文集云邵武黃君元杜少負不羈所讀經史子集一發之於文欲與古作者匹康熙戊子歲儀封張清恪公撫閩用龍峰書院延有志之士脩書講學其中元杜侍其尊君存菴先



生來與是選

一希堂文集十二卷漳浦蔡世遠著石遺室書錄云卷一前有卷首皆頌  
颺之作其餘序四卷記一卷傳一卷論說書共二卷墓表誌銘行狀其  
一卷祝文祭文共一卷雜著一卷堂名二希者据門人雷銑翠庭跋云  
吾師嘗自記曰學問未敢望朱文公庶幾其真希元乎事業未敢望諸  
葛忠武庶幾其范希文乎又云記稿藏篋篋笥二希堂集鋟板時交師  
長子倬雲謂將並梓詩集補入此記抱病遂不起稿難檢矣前有純皇  
帝在藩邸時一序推挹甚至四庫全書提要述之世遠字聞之康熙己  
丑進士官至禮部侍郎諡文勤

約園詩鈔二卷福清郭雍著榕城詩話云雍字仲穆康熙癸巳舉於鄉工  
詩古體學陶近體宗王孟五言尤稱書法規摹鍾王人亦高潔四庫全  
書總目云雍一字書禪約園其號也是集各體詩共二百餘首雍自謂  
前後所作多屬近體於古體歌行間存一二樂府則有待而未及今觀



其詩惟五言律詩頗有局度餘皆平平詩不沿溯於古而先求之偶儷之格終不能探其本也

集虛堂餘草一卷郭雍老石遺室書錄云雍自號縣亭書禪此爲其續刻詩目錄後有乾隆己未受業諸子跋云約園詩特夫子全詩之半耳而其半亦經手訂癸卯後欲爲續刻今乃付梓詩清淡有餘

居易軒詩鈔侯官鄭三才著詩鈔小傳云族子三才爲東光令以虧帑事發轉徙燕趙三十年在都日常招吟侶至八里莊看杏花酒酣卽席賦七言古詩一章臨川李穆堂先生在他席見之擊節咨賞時冠蓋如雲彼此不相顧而散遲十年臨川總制畿輔參亭方罷官落拓循例修謁刺入遞延見首及杏花詩背誦不遺一字問記憶李生否參亭茫然久之乃省悟其後卒藉臨川力以完夙逋論者稱爲詩人奇遇案三才康熙癸巳進士

小山詩文集晉江莊拱顯著道光通志云字爾韜一字小山康熙癸巳舉



人經術湛深弱冠爲安溪李光坡所賞延與參纂十三經注疏晚授水  
定教諭以老疾辭

雪巖詩集龍溪林夢斗著二希堂文集云漳故有名進士曰鄭白麓戴麥  
村白麓閔博有史才負不可一世之槩麥村以風度勝晚年詩尤工擅  
當是時二人齊名於漳顧凡有論著或商確事宜皆曰必吾子牛也康  
熙癸巳歲余修郡志於漳城鄭戴已亡子牛每助成之或急就之章余  
窘迫無以應者子牛從旁私以其稿授余子牛之詩咏古撫時悲壯清  
峭令讀者悄然以思

耕雲詩草侯官鄭基著道光通志云字紹庵官浙江鹽法道乞養歸與謝  
道承陳治滋黃任劉敬與輩結詩社久之哀而成集案基康熙甲午舉  
人

韋齋詩集建寧余敏紳著沈德潛序云集中秋興八章當時所傳誦日下  
者也予最愛其漫興詩客中重作客春盡不知春意味雋永傳臚日作



辛藉樸誠逢聖世肯圖溫飽媿前賢忠懷介節流露毫端案敏紳康熙  
乙未進士

歲學步聞縣蔣上豸著林起鸞序云繡巖總角時便出驚人句弱冠啓  
賢書供職西曹余讀其弔古感懷詠物作悉有高曠致案上豸康熙丁  
酉舉人

近道齋文集六卷詩集四卷安溪陳萬策著四庫全書總目云萬策字對  
初一字謙季康熙戊戌進士官至詹事府詹事緣事降翰林院檢討終  
於侍讀學士萬策久從李光地遊多得其指授然平生詩文多散佚不  
收此本乃乾隆癸亥其子冕世所輯其中西算法異同論頗能究其所  
以然李光地施琅諸傳軼聞舊事亦多可考云

秋水堂文集六卷詩集六卷復齋遺集南靖莊亨陽著官獻瑶序云復齋  
先生自其少時從鄉先輩戴麥村學詩輒工復與漳浦蔡文勒公結社  
東江以古今文鳴今文孫漸等悉心蒐羅部分井然凡先生當官碩畫



訂議皆有考焉旁及算法亦附於後

莊元仲集一卷莊亨陽著四庫全書總目云此集僅文十一一篇乃其官准徐道時所上河防條議也

白雲集建寧李榮英著宋仕琇序云同里李先生萼侯年十八以武舉鄉試思自奮雲臺之烈既以不得志著書而世以武故罕省錄者先生每言之輒憤噎呼咤其書不自顧惜散佚略盡兄子俊收得什一命曰白雲集白雲先生所自號也案榮英康熙庚子武舉人

小蘭陔集十二卷閩縣謝道承著四庫全書總目云道承字又紹號古梅康熙辛丑進士官至內閣學士兼禮部侍郎是集詩十卷文二卷道承假歸養親故取南陔補亡詩語名集而集中所載則應制館課之作皆在焉不專家居作也其中碑帖題跋亦頗具鑒賞香樹齋文集云往余與古梅同官友善見其爲詩喜道人忠義憑弔遺跡輒命筆千言躊躇滿志其或同遊接席氣類稍不合者雖促之爲詩終日不得一字



劍虹初稿劍虹續稿長樂吳文煥著國朝詩鈔小傳云觀侯落拓不羈喜讀書性耽酒一月不數日醒詩最豪爽大致於蘇陸爲近吾鄉比戶能吟羣奉林贍部高典籍爲鼻祖聲調圓融如所稱晉安風雅者劍虹辭而闕之獨標雅健盤空硬語傑出於柔筋脆骨之間固未易爲一二俗人言也有句云欲覓相知定文者近來沈韻比江花蓋指同里江爾熙暨同年沈珊友而言余輒就篋衍所藏錄數十首竊自比於江沈之列案文煥康熙辛丑榜眼

崇雅堂詩鈔十一卷福清李開葉著石遺室書錄云開葉字磁林趙大鯨序云先生以文行高鄉里康熙辛丑成進士入翰林卽假歸不復出鄧以臨序又言居史館素心玉立需次銓曹守愈堅遂以義退是曾改官吏部矣一時論其詩者皆以爲學陶然未見其似

漫游草八卷寧化黎良德著熊爲霖序云懷古好游士也攜一琴一劍與名山巨川爲緣如五嶽峩峩太行之雄偉瞿塘禹穴龍門之險蕩與夫



咸陽燕薊之威壯胸中口中時復吞吐出沒槩託之於詩所至哀然成帙字質存懷古其晚號也案良德官州同知

嘯谷草寧德崔衍湄著衍湄字星野從子少承家學工吟詠

蛩吟詩卷寧德陳裔長著裔長字庚續性恬淡善書法與林士愚相倡和梅村詩集寧德林士愚著士愚字希賢工詩善卜不與世俗交隱重金山吟誦自娛

鳴盛集羅源黃式著式字憲可以廩生肄業國子監授州同善詩古文詞連江陳元登稱其詩中有史詞中有畫

蘇氏詩集一卷南安蘇山著康熙閒諸生六十年臺匪朱一貴亂從征有功授守備不就隱居以吟詠終以上五人見道光通志


丁季常詩集晉江丁岷著道光通志云岷字季常生平服膺陳白雲集故其所作亦多相近

黃越甫詩集漳浦黃元美著藍鼎元序云越甫詩上追漢魏下薄初唐



餘堂詩二卷侯官林兆惠著葭村草堂集云先生康熙己卯與張遠林  
佶同舉於鄉詩得國初諸老氣象而工於言情時有酸楚之調以中年  
所親盡喪子焉獨存故惜閩詩傳閩詩選閩詩錄均未採







福建藝文志卷六十五

集部二

別集十一

蔗尾詩集十五卷文集二卷建安鄭方坤著四庫全書總目云方坤天分既高記誦尤廣故其詩下筆不休有凌厲一切之意尤力攻嚴羽滄浪詩話詩不關學之非然於澁字險韻恆數十疊雖聞見層出波瀾不窮要亦不免於炫博此又以學富失之所謂矯枉者必過直也其詩凡分十五集曰刪餘草曰公車草曰木石居草曰公車後草曰木石居後草曰丁年小草曰叢臺稿曰春明草曰廣川稿曰酒市稿曰一粟齋稿曰瓶花齋稿曰杞茶軒稿曰詩話軒稿皆古今體詩曰青衫詞則詩餘附錄者文集二卷亦大抵儷體居多蓋其根柢在六朝也案方坤雍正癸卯進士

望古集十二卷鄭方坤著道光通志云卷一賦卷二詩及騷詞曲琴操



歌謠卷四詔制表上書狀牋令啓卷五書牘卷六尺牘論考述辨解說  
卷七序卷八引記卷九冊傳卷十記檄判頌贊卷十一銘箴志對設論  
文記遊碑墓表誄祭文弔文卷十二跋雜著

涵有堂詩文集四卷福清游紹安著四庫全書總目云紹安號心水雍正  
癸卯進士官至南安府知府是集詩二卷文二卷其守南安幾二十年  
故多南安所作其文務爲奇崛語詩亦欲以生僻見長案道光通志載  
若素齋草無卷數云紹安字鶴洲有惠政南安人祠祀之

拾餘草莆田俞荔著蘭陔詩話云峯山嶺然絕俗晚年究心釋典結茅山  
中罕至城市詩如其人沙澹無烟火氣沈歸愚云碩卿居官清正以失  
上官意落職歸築堂曰迂溪猶柳子厚自愚而愚其溪也案荔雍正甲  
辰進士

崇本山堂詩鈔十卷文集二十卷建寧徐時作著沈德潛序云筠亭以名  
進士爲民牧所至以廉能稱以太夫人春秋高乞身歸年未及艾杜門



息軌銳氣讀古人書歷時久而信道篤其所得當不止於語言而卽以  
語言求之其詩若文具在亦未嘗有所雜糅於其閒案時作雍正丁未  
進士

嘯月亭詩鈔徐時作著黃任序云十年前余見崇本山堂詩集凌駕意氣  
陶寫性情與酣落筆雷掣風馳政與所行事相類而逸思遠韻仍歸蘊  
藉綏安多風雅筠亭與家于叔朱碧峰二廣文尤交善碧峰論詩之源  
流正變最詳備持論亦最嚴今春爲筠亭選嘯月亭詩鈔家于叔爲之  
請序於予

鄧翰林詩文集德化鄧啓元著案啓元字公季一作幼季雍正丁未殿試  
一甲第二人博通經學與內閣學士方苞纂修三禮王子典試湖北所  
拔皆知名士

辦香堂集侯官林正青著賭棋山莊餘集云是集假之友人劉筠川筠川  
得之烏麓程氏爲侯官林吉人哲嗣洙雲所作吉人於汪鈍翁陳午亭



爲高爵洙雲耳濡目染故其文頗進退有法度而不合者十之一二耳  
石遺室書錄云鈔本分陶舫後集燕遊集吳遊集小海集小海後集北  
行集其燕遊集之前尙有一集首葉破損不知其集名矣道光通志作  
詩文集四卷案正青雍正閒由貢生薦辟

鹿洲初集二十卷漳浦藍鼎元著曠敏本序云鹿洲經濟之儒文章之匠  
也其志存乎世道人心其心繫乎生民社稷刊有道之碑殉陣罵賊必  
錄也表柏舟之節投環刳股必錄也形勢之要害士馬之強弱必紀之  
海洋之情狀蠻徼之咽喉必紀之四庫全書總目云此集爲其友曠敏  
本所編初定於雍正丙午越六年壬子又合其續稿重法定之仍爲二  
十卷鼎元喜講學尤喜講經濟於時事最爲留心集中如論閩粵黔諸  
省形勢及征勦臺灣事宜皆言之鑿鑿得諸閱歷非紙上空談至於所  
敘忠孝節烈諸事亦點染生動足裨風教其中如論直隸水利之類生  
長南方不能達北方水性未免撥拾陳言與顧太史書之類自雪冤謗



雜以輕薄謔言尤爲所養不純然文筆條暢多切事理在近人文集之中猶可謂有實際者也一希堂文集云鹿洲負不羈之才語經濟必曰諸葛武侯言文章必曰韓吏部以振古人豪自命雖然義理之氣氣也血氣之氣亦氣也鹿洲今年且過五十磨礱浸潤學益粹養益深蓄其氣以裕其用以發之於文吾知文且進而駕於古案鼎元雍正閒拔貢生

東征集六卷藍鼎元著石遺室書錄云康熙六十年臺灣朱一貴作亂藍廷珍統師平之此其弟運籌所作据廷珍序稱出軍以來予胷中每有籌畫玉霖奮筆疾書能達吾意又深諳全臺地理情形調遣指揮並申要害云云玉霖鼎元字集中爲書檄露布札論諭紀看語八體文四庫全書總目云第六卷中紀地形七篇於山川險要尤言之井井廷珍舊序稱擇可存者百篇而此刻之文止六十篇蓋鼎元又加刪削也

天心閣詩稿二卷閩縣陳發其著黃任序云心齋爲詩無艱苦僻澀之態



而閱肆冲恬自然雋永蓋所養者熟也案發其字師說雍正開拔貢  
冠豸山堂文集三卷連江童能靈著四庫全書總目云是編刻本一卷為  
中天河洛五倫說鈔本二卷皆論學之文然刻本題曰卷一必尙有他  
卷非完書也其論河圖之中數三五配大學之三綱領外八數配八條  
目一二三四為明明德之條目六七八九為新民之條目未免牽合至  
於辨六十四卦與大衍相合之數又以九卦卽序卦之餘蘊序卦爲氣  
九卦爲朔亦苦心研索之學然大抵附會於術數朱子所謂易外別傳  
者也案能靈雍正開拔貢

月湖集古田何夢白著夢白字玉澄雍正開諸生與同邑卓于祚李士弘  
陳滌友善葉標元結凌雲社四人皆與焉

非園詩集晉江莊麟著麟字非園工詩精韻學析六書之毫芒正閩音之  
訛舛學者宗焉

後村文稿四卷外集二卷同安劉蔚著蔚字希仲雍正開諸生精學淹博



爲文規樞東西漢以上三人見道光通志

雲思館詩鈔侯官陳純著唐堂集云驥仲弱冠遊京師選授國子監教習與王樓邨張匠門顧秀野郭子宮吳寶崖相唱和其母夫人亦能詩凶訃至公卿以下製詩輓赴弔者數百人奔喪歸里營葬贊復出適楚依典試李吳山適粵依總戎裴某遂卒於惠州年三十有二其詩不在林鴻王傳下也其以雲思名者遊而不忘其親也案純雍正閒貢生

激鳴草松溪陳峻侯著二希堂文集云陳峻侯來龍峰書院從學於余能孺然自投於俗善古文尤嗜詩歌

去園草邵武未經華著道光通志云經華一作維華字非紫雍正閒貢生嘗和李商隱無題詩三十首

怕庵詩稿建寧朱耀著朱仕琇序云放叔父漢燿先生別字怕庵負異才求仕不得志瘖而卒其詩大率漁磯陟嶽逍遙自得之情

淇園詩集二卷寧化陰延昇著雷鏞序云丰致悠然其意思深長處尤有



事外遠致案延昇雍正開諸生

西園詩集寧化謝崧著崧字毓南雍正開諸生汪韓居詩話云崧南創西園別業吟詠其中年八十餘猶能作蠅頭楷其齋額曰讀來世書邑雷翠庭副憲讀書偶記錄之

天山草堂集寧化邱世琮著世琮字位坤居泉下去泉上李世熊居甚近好讀書以激發其志氣老於諸生所居曰天下草堂因以名集同里雷鉉謂其詩與文皆脫町畦而自立崖岸論史更有特見

磨鏡集寧化伍軾臨著軾臨字仲蘇雍正開國學生學問淹博尤長於詩香遠堂集哀哀吟孺慕藏稿清流巫天唱著天唱字眉山雍正開貢生五歲喪母泣不欲生父死廬墓五年爲哀哀吟孺慕藏稿以寫其悲

拙山詩草二卷連城沈烈著烈字象包諸生工詩書行草篆隸晚年徜徉林泉以筆墨自娛以上五人見道光通志

綵痕書屋存稿十卷建安鄭方城著詩鈔小傳云伯兄石幢先生先大夫



蕉溪公冢子筮仕蜀之新繁嘗於叢臺官舍刻燭賦詩拈題得寒析限  
雙字韻方坤先得句云遲久更疑六于喁唱或雙客皆歎其新穎及先  
生詩成則云偶作行歌互應驚好夢雙於時徐靜谷先生在坐乃拍案  
叫絕案方城雍正癸丑進士

石幢先生遺文鄭方城著雲寥山人文鈔云荔鄉先生古文禮慶溫雅尙  
有六朝金粉氣石幢則恪守唐宋八家遺軌編中若太子丹呂不韋伍  
員諸論藥性論文論及答劉九畹書哭亡姪文洵歐蘇嫡派也上諸大  
憲條陳事宜諸書深明時務足徵儒者經濟駢體雖酬應之作亦吐屬  
風流附諸編末焉採懷草前已附刻行彙集第十卷末更標題茲具有  
石幢先生自序故不嫌另刻芥舟先生古文僅鈔得數篇俟再有所獲  
當爲續刻

種菜山房稿古田林爲翰著道光通志云爲翰字瀛洲一字鈞雪雍正乙  
卯舉人籍屏南數奇不遇閒居講學以詩自娛



山陰集一卷歸田遺草一卷侯官林其茂著四庫全書總目云其茂字培  
根乾隆丙辰進士官山陰縣此二集一爲官山陰時作一爲罷官後作  
皆其茂歿後其婦弟鄭天錦所編冠以魯曾煜所作家傳沒時年僅三  
十九

桂枝閣詩文集莆田吳孫逢著孫逢字開吉乾隆丙辰進士授兵部主事  
遷刑部員外郎監督南城糧儲釐別蠹弊無微不至

林敬亭詩文集晉江林簡士著簡士字敬所乾隆丙辰進士授國子監典  
籍茹苦食淡以紙爲帳懸木爲几革入監例金諸生感德同官有異言  
遂告歸案以上二人見道光通志

香雪齋集晉江陳一策著榕城詩話云爾枕七律清婉可誦有訪友詩云  
草堂新築傍苔磯城郭風塵到此稀背閃夕陽雙鳥沒屐粘晴雪一僧  
歸石橋水色虛搖檻板屋梅花亂撲扉今日似遊人境外與君相對欲  
忘機案一策乾隆丙辰以貢生薦舉博學鴻詞



瑜齋詩草一卷侯官郭趙璧著四庫全書總目云趙璧字名瑾乾隆丙辰舉人是集乃趙璧沒後其子文煥所編後其子文海又搜求佚稿附益之凡古今體詩一百一十一首蓋趙璧喜吟咏而不自收拾故散失之餘所存僅此云

緝齋詩文集十八卷漳浦蔡新著朱珪跋云葛山師相致政將歸出詩古文草稿示珪校勘珪擬刪其酬酢之作而存其言之有物者公生平不肯以文詞自炫乃讀其詩文皆有關於性情倫物之大所謂修詞立其誠者而經史講義十篇則宣公之奏疏西山之衍義無以過之公之嘉謨嘉猷入告者亦足窺見一斑矣案新乾隆丙辰進士謚文恭

遊臺詩一卷紀遊草一卷臺灣後遊草一卷漳浦陳夢林著藍鼎元序云臺灣後遊草吾友陳君少林征帆三渡之作也其初渡臺以聘修諸羅縣志君既有遊草矣辛丑再渡臺以制府滿公屬叅軍事未幾而復有癸卯之遊殊非其意憶征征帆諸詩所爲作也案夢林乾隆丙辰進士



學鴻詞

翁桃湖集古田翁文達著道光通志云桃湖乾隆丁巳進士所著詩書八  
詠皆曰道其所得一時傳誦

坐進士古文寧化巫近漢著穆堂別稿云閩中學者以寧化爲最盛雷侍  
講貫一其尤著者已復識巫君碧瞻碧瞻旣成進士擢爲咸安宮官學  
生教習三年課最當授部主事主選者謂內外兼用乃授樂昌令其文  
有高識有篤論蓋皆道其心所得者案近漢乾隆二年進士

席未亭古文集建寧席天霽著朱仕琇撰墓誌云先生字作舟號未亭乾  
隆戊午貢人大學建寧僻處閩西無能爲古文者先生始尋宋文憲楊  
文貞之遺益治經子書學爲古文其言樸淡有遠致時人不識也弟子  
萬斯年游太學以示憲副寧化雷公公異之爲作序

初陽書屋詩鈔侯官劉錫經著錫經字天傳號藜仙士棗子道光乙酉舉  
人其詩體格纖麗音情流美兼善丹青



剛齋詩文臺灣張從政著從政字達夫事母盡孝學問該洽乾隆庚申中  
分修郡志以上二人見道光通志

蘇滿齋詩鈔侯官劉士棻著道光通志志是集分十卷曰抱膝吟紅梅吟  
擁鼻吟轉蓬吟草望瀛集各二卷士棻字周有號心香嘉慶辛酉翰林  
出宰嶺南性耽詩酒而所至輒有廉名惠州知府寧化伊秉綬贈以詩  
有玉堂才子貴珠浦長官清之句案又名自怡悅草堂詩鈔賭棋山莊  
集云所爲詩辦香十硯老人夫乾嘉之間袁隨園以通隱享盛名其於  
十硯欽佩弗諼所謂唐代詩原中晚佳者先生曾遊小倉山房鐵芥之  
投其亦有所推挹乎

南岡詩集六卷邵武朱敏求著朱仕琇序云南岡喜爲詩其思刻苦一言  
一句必求合於唐人自貞元元和以降不論也每成一篇或數易其稿  
嘗論詩謂當如紀昌學射先學不瞬繼則視小如大視微如著蓋取於  
孤往而專精至大家則諱言之以其無町畦畔岸將至窮大而失所居



也大旨本鄉先生嚴羽之遺論而加峻焉其所自著規模既久漸近自然見者謂有常建王昌齡韋應物劉長卿諸人遺風案敏求乾隆辛酉舉人

西峰詩文集三十二卷武平李夢苡著道光通志云夢苡字非珠乾隆辛酉舉人漳浦蔡世遠稱其學博才高可進以遠大之業工詩及書

不已言集晉江方狎著汪韓居詩話云羽中詩集積年所著凡數十卷知是埋頭雪案不務聲華之士案狎乾隆甲子舉人

蒼筤詩集同安林應震著閩詩選云應震古作似晉魏近體學唐時下老手也案應震字鯉湖號東方生乾隆甲子舉人

香嶺居士集上杭邱鍾靈著全閩詩錄云鍾靈號芝山乾隆甲子武舉人官鎮江衛千總汪韓居詩話云芝山精行楷書與王夢樓鮑海門李小花殷石琴張石帆諸名士流連詩酒吳進士清夫手定以秋海棠七絕一首壓卷爲畫秋海棠圖索芝山自書句其上作香嶺居士小傳遺之



月坡詩集四卷古田郭植著四庫全書總目云是集分四編一曰雪竹草堂集一曰北遊集一曰臺江草一曰溫陵草以集中編年考之迄於辛酉蓋其鄉試中式之後所刊也案植字于岸乾隆壬戌進士

瀟湘遊草侯官林玉友著道光通志云玉友乾隆間布衣以子崑瓊贈湖南宜章知縣是集乃就養時作故曰瀟湘游草

離垢集五卷上杭華岳著南檐瑣錄云新羅山人畫境意造神會出古法之外而不背於古法詩亦如之所作多五言古體力追大小謝得其幽遠之趣絕俗離立殆不食煙火人語姪孫時中後序云公原字德嵩生於閩家於浙不忘桑梓之鄉因自號新羅山人新羅者閩南汀州之舊號也其詩於阮雲臺先生輶軒集中採登數首石遺室書錄云秋岳此集皆詩大略選體昌谷體宋元人題畫體無長篇前有徐紫山厲樊榭諸人題詞顧師竹黎庶昌羅嘉杰諸人序蓋嘉杰所重刻也

介石堂詩集十卷文集十卷閩縣郭起元著石遺室書錄云起元乾隆初



人字復齋官江南知縣權桐城詩文均有自序有儲大文像贊詩清妥  
多詠物詠古蹟之作詩文皆有圈點詩每卷後有友朋跋語文每篇後  
有友朋評語

江湖閒吟八卷漳浦王道著四庫全書總目云道字直夫官金山縣知縣  
卷首有黃之雋序稱所著有鹿臯文集有京華稿今未見此集題曰江  
湖閒吟乃其罷官後寓居朱涇所作其板心則題曰鹿臯詩集總名鹿  
臯以詩文分集而詩集之中此爲一種也據所自述初學李夢陽後乃  
變以王維陸游然先入者爲主矣石遺室書錄云集爲黃唐堂沈歸愚  
二人所定黃稱其由教習出宰金山罷僑涇讀其述懷七哀有會而  
作等篇君子傷之二希堂文集云直夫所爲詩從近體入沈鬱雅健近  
所作古風樂府氣味淵蔚意理蓄足其不懈而力於古者耶

苔泉閣集殮聽樓詩集侯官陳作楫著劉鄰初序云五七古莫非造懷指  
事之作其遺辭也不求纖密之巧旨峻味深風人之遺案作楫乾隆初



貢生

翁南聲詩集晉江蔡圖著道光通志云圖字思襄乾隆初諸生郡中重建  
肅清樓中秋夕諸文士方作詩歌圖後至援筆爲賦賦成燭未及寸一  
座驚異

梅崖居士文集三十卷外集八卷建寧朱仕琇著石遺室書錄云福建人  
以古文詞名家者絕妙先生敝精力於爲文在吾鄉千百年來當首屈  
一指次則高兩農先生遵巖散體中間以駢語抑又其次也朱珪序云  
始力抗周秦兩漢與荀卿屈平馬遷揚雄諸子搏必伏而監其剴然後  
導而匯之韓柳歐陽王曾姚虞以下若首受而委逆也及其晚而反復  
於遵巖震川諸家心愈降而客氣盡於是奇辭奧旨不合於道者鮮矣  
故其爲文善狀物情雷鉉序云其文章變化離奇一以淳古冲淡出之  
其所自得蓋在文字之外朱筠志墓云生平以古文詞自力歸於自得  
要其意欲追古之立言者以爲清穆者惟天澹泊者惟水含之阻之得



其妙以爲文者惟人魯仕驥撰行狀云以己意求古人之文上下千百  
年聞一以昌黎韓子爲師又云爲文章自始學韓子其後更博采秦漢  
以來諸家之長獨成其體於韓子之後案朱先生所自言與諸先生所  
推挹庸有太過與不及者仕琇乾隆戊辰進士

梅崖詩偶存朱仕琇著注韓居詩話云梅崖生平以古文詞自力不喜作  
詩顧每一篇出輒淵古清深淵然有合於六經之旨與所爲文相埒

綠筠書屋詩鈔十八卷閩縣葉觀國著石遺室書錄云毅菴先生與孟瓶

菴先生一時有二菴之稱詩亦相伯仲注韓居詩話云先生秋齋雜詩

有云奈何未俗偏本末少取裁丞嘗享祖禰高曾斥不陪鄭箋及賈疏

高閣生塵埃又有云上乘貴妙悟科律嚴且詳使事犯指戒太盡來誇

傷偶然涉議論嫌與性情妨案似守滄浪詩話之說者詩分臺江集瀛

洲集滇南集瀛洲二集嶺右集垂橐集瀛洲後集得槐軒集蜀道集江

左集得槐軒後集人扶集觀國乾隆辛未進士



葉學海文集一卷海澄葉廷推著緝齋文集云海澄葉君學海與余交久嘗讀其所著地理原說察理精而信道篤卓然不惑於流俗所居葺大觀山房縹緗數萬帙其發爲文章必原本六經旁及子史不爲鉤棘峭厲奇僻詭怪之習務自道其所得而有當於世用案廷推乾隆十九年進士官榆社知縣

浩波遺集三卷侯官鄭際熙著瓶菴居士文鈔云吾友鄭孝廉大純晚出曆龔灌溉獨慨然以少陵爲師其志專其思苦其所言不出於忠孝仁義之旨四庫全書總目云際熙字大純乾隆丙子舉人年三十六而卒是集爲其弟際唐等所刊凡詩二卷文一卷文中有杜律篇法序一篇稱能詩者未嘗先言法而自中法且神而明之變法以自成其法未有按一定之科條而譜之舍其性情才力俯首以從法也其論亦足破拘攣之說其書則未之見也

杜律篇法二卷鄭際熙著案詳際熙浩波遺集下



瓶菴居士詩鈔四卷閩縣孟超然著石遺室書錄云各體皆流利自如七言律尤工穩似得力於朱晦翁而遜其深厚案超然乾隆庚辰進士

蘭陔四六蘭社詩稿黃石山人詩集莆田鄭王臣著朱仕琬序云山人詩凡數變始則下氣愉思慢肌膩理以求柔淡繼則感傷興廢衰敗姦良理與象協然後參錯調劑斟酌屢厭厭蹂躪於古大家之庭非一朝一夕之故矣案王臣字蘭陔乾隆丙子副貢生

林載臣詩集二卷仙遊林奮著道光通志云奮字有上號載臣乾隆壬午舉人其詩隸事運意俱能不落蹊徑

學圃詩存侯官林崑瓊著射鷹樓詩話云醇叔乾隆乙酉鄉榜與從兄開瓊春瓊同遊京師先後主大興朱文正河閒紀文達二公家名噪都下時稱爲閩中大小林云詩多雅健

瓶城居士集一卷侯官林喬蔭著課餘續錄云聞有詩集未得見文載擬東巡賦土爾扈特全部歸順頌皆有序是博我王道宏我漢京之作根



抵禦深駢儷中巨手也篇長未錄其福州石塔碑刻前後二記考核史  
部詳審無閒注韓居鄭昌英采取以入其叢刻與魯絜非進士書論文  
尤爲中肯另錄以資探討他作博雅益人皆堪不朽案喬蔭字樹亭乾  
隆乙酉舉人

種蘭堂詩軍中紀事詩侯官林龍章著龍章字彝雅號旭臺乾隆乙酉舉  
人官終湖南永順同知是集乃宰龍山時禦白蓮教作

晚香詩集二卷將樂張興南著興南字振鵬乾隆乙酉拔貢生授廣東欽  
州州判善書法工詩以上二人見道光通志

水竹居賦鈔一卷建寧朱仕玠著甯人望序云先生官德化學歌詠餘暇  
著爲賦若干首名曰水竹居賦鈔案仕玠乾隆間拔貢生

筠園詩稿三卷刪稿三卷朱仕玠著弟仕琇序云筠園先生馳騁風騷之  
末流者十餘年而後擇其言之精者自定上中下三集其餘將盡畀炎  
火余甚惜焉筠園旣以奇逸之氣用盡歷代之體又詩者性情之端今



將諱之不自於世是筠園性情之全不出因檢其十之一二附於正集  
之後命曰刪稿

谿音十卷音別四卷朱仕玠著梅崖居士文集云楊林谿水出百丈嶺嶺  
界於南豐建寧二邑筠園家谿上授徒溪西之草堂往來溪側輒聞溪  
聲感而寫之于是其詩愈富余嘗序筠園詩以爲得高岸深谷之理今  
讀所補琴操古歌益淵邃正變備具至效陶諸什則無懷葛天之遺風  
猶有存者閩遊詩話云朱廣文字碧峰工詩賦得原上草可稱古調獨  
彈

和紅蕉山房詩錄一卷朱仕玠著自序云乾隆丁亥戊子閒僑寓榕城觀  
察張南坪出示紅蕉山房詩余讀之因取其中五十調次韻和之

和陶詩一卷朱仕玠著山木居士集云先生幼習風騷自漢晉以迄三唐  
詩人之體無所不備暇日無事更著和陶一集雖其爲詩之旨不必斤  
斤於規倣陶公而其慤而摯婉而多風實足繼陶公而追三百篇之作



者

漱石詩稿建寧朱仕翰著古山文鈔云越臺初工科舉之業不得志從李  
樾園先生學爲詩晚自號漱石山人

留蹤集建寧危景楊著朱仕琇序云族姑之夫危景楊詩思甚敏晷影未  
移口占立就凡市闌戲劇兒女褻燕之語韻之輒成秀句

屏峰集建寧鄧作梅著朱仕琇序云鄧君汝調居邑西泥坑有山如屏命  
曰屏峰因以名集其文崢嶸涵澹類得山水之助

復軒詩鈔四卷建寧李書著朱仕琇序云鄴籤集中載送余北行訪余松  
谷二詩其言鬱伊愀蹙頗自嗟其不遇然誦其田家山居諸什瓜棚樵  
圃嘯詠自得則知士固有不失已者其外之榮辱去來隨其所值蓋不  
是久役其中也案書乾隆間諸生

李樾園集建寧李俊著山木居士集云樾園先生教授山中抱道自守蓋  
數十年其志趣學問悉寄於詩其所爲詩旣日多門弟子因請輯而刻



之先生乃自定爲六集以授梓人時乾隆二十三年也迄今十有五年先生之詩日益富門弟子又請輯而刻之先生於是復自定爲二集案後乾隆閒副貢生

朱鼎堂詩集一卷建寧朱離著抑快軒文集云其詩長於五古又獨多大抵王大謝旁及諸家課餘續錄云此梅崖先生羣從其詩服習文選也案離乾隆閒貢生

遠峰詩存二卷龍巖林泰著道光通志云泰初學詩於袁枚後與吳錫麒洪亮吉相倡酬當時有林七古之目姪某序云族叔遠峰僑居吳中江左名流咸推爲作手然負才氣不修邊幅年六十三卒於吳葬虎邱之西此卷久存虞山孫子瀟太史家余與太史互相精梓得古今體若干首付梓案泰一名寶後改名鑄

印癖齋詩稿二卷閩縣劉若川著林丞英序云同年友劉君奐爲祖入閩邑庠乾隆甲午一應鄉試旋卒卷中如哭姊懷友之篇及鼓山方廣鑿



小箬紀遊諸作皆自寫其情性幽次

春草堂詩鈔閩縣謝士驥著朱景英撰傳云士驥字宏卿一字汝奇嗜學工詩性故蕭疏詩如其人善草書好蓄硯不樂仕進構逸齋居之圖史縱橫客至清談竟日樵蘇不爨泊如也卒棲隱以老

林通庵遺詩一卷閩縣林天申著瓶庵居士文鈔云天申字仲嘉工詩而窮客武人幕無所合輒引去

紅雪樓詩閩縣李肇杏著閩詩選云李七丈詩如澹烟明水中吐出菩提妙香案字芸父乾隆閒貢生

星臥樓集二卷閩縣郭金臺著陳照萬序云五古學沈宋七古宗西傑五七律寢食錢劉五七絕則出入元白閒要以唐賢爲歸不雜宋元以下案字充九號仙客

翁海漁詩鈔侯官翁曾著二勿齋文集云一名溱字徽西補博士弟子不甚悅舉子業喜山水吟詠家無擔石儲壯年喪妻不娶攜幼子客於琅



琦海與聞垂二十年乃自號海漁也幼從其舅陳照萬學詩其詩格律及古要多本於性情所鈔殆五分之一云

天尺樓詩文稿侯官吳春芳著春芳老於場屋其詩文多貧困寫懷之作鶴聞遺詩侯官何綏著綏字鶴聞諸生力貧養母賣志早歿詩多愁苦之音以上二人見道光通志

广亭詩鈔侯官張國洛著注韓居詩話云息廬字學蘇米詩憂憂獨造有幽秀之致案國洛乾隆間諸生

疎影樓稿一卷侯官許德瑗著石遺室書錄云德瑗字素心早寡無子詩自悽惋痛切句如七夕云相逢莫灑臨歧淚多少人閒永別愁樓居感懷云惆悵晚涼孤雁過浮雲無際碧天悠贈薩松齋大姊云舊事話來腸幾斷累君爲我一沾襟倔強句如寒松云勁節原同天地老堅心不怕雪霜偏霜菊云絕好如君稱晚節有誰同汝鬪霜華雪梅云鐵幹豈能增潦倒冰容無那自低徊懷方芷齋夫人云薄命固知天下有孑身



惟受此人憐亦可傷矣前有林喬蔭汪新黃惠三序後有方芳佩一跋  
自芳集一卷侯官林瑱著石遺室書錄云瑱女士詩皆近體雖淺薄而清  
雅有餘悼亡送殯諸作時有沈痛語前有陳登龍序

浣芳集侯官湯碧雲著素材小草云湯碧雲者侯官貧家女也美秀有文  
喜爲詩詞麗而有則嫁未幾天有浣芳集幽憂哀豔不堪卒讀人比之  
斷腸集

李松風詩集福清李振濤著道光通志云振濤字松風乾隆閒諸生工篆  
隸行楷尤精製硯及鐫印

尊山詩集福清鄭永錫著注韓居詩話云三懷約園高弟詩字寒瘦比約  
園尤甚案字三懷乾隆閒貢生

餘亭齋文稿二卷永福黃惠著石遺室書錄云惠字心菴前多擬作謝表  
後多神廟碑記壽序及代作之文案惠任從子

凍井山房詩稿永福黃虞世著虞世字成運號韻亭任從子聞清知縣方



亭鶴爲刊其集

草庵集六卷晉江黃彬著彬字蓮士性恬淡好遊山水所至皆有題詠初與郡人爲詩社號敬園十子晚儼居廈門構小樓曰看山終日坐卧其中

淇園詩古文集建安周宗濂著宗濂字仰溪乾隆閒恩貢生博極羣書爲文千言立就鄰有吳某貧不能卒學日給館殮以勉其成吳卒爲名諸生鄉人稱宗濂爲長者以上三人見道光通志

北窗詩稿浦城周鼎著縣志云鼎字洛新其爲詩流露靈府蕩滌塵埃乾隆甲辰忽取所爲焚之遺稿僅有存者

讀史小樂府二卷泰寧江中時著自序云檢耨田廖夫子遺集得詠史小樂府一册上自戰國下迄有明得千四百有奇遂仍其體五言二韻亦得九百有奇

愚庵詩集八卷建寧李大儒著魯仕驥序云愚庵幼從樞園先生游嗜爲



詩見者無不驚歎余與交十餘年嘗因愚庵受詩法於樾園先生案字  
魯一號愚庵

吳士林詩集建寧吳游著朱仕琇序云士林何廣文梅同里嘗受業於李  
孝廉榮英爲人溫慎工書法補諸生以教授自給不跡有司之庭其詩  
婉麗推激宛然孝廉廣文之遺烈

芥舟吟稿建寧李大仁著李俊序云余族子大仁丁父艱以哀毀卒年僅  
二十五得詩若干首余爲精存五言詩二十餘章帙少不能孤行因附  
余詩集後案大仁乾隆閒諸生

松陰詩鈔四卷建寧朱佑著李俊序云佑字啟堂仕琇子諸生詩師法太  
白瓣香王子孟溯其淵源不失筠園梅崖家法

黎生詩汀州黎良行著唐堂集云閩汀黎生良行予試寧化識之所著詩  
吾友陸錫山嘗評之曰樂府近魏晉五律學杜陵知言哉生詩學蓋得  
諸其鄉李先生元仲云元仲與黎楚有先生遊持論往復生之祖也



卽謳草二卷長汀張廷賡著道光通志云字翊堂乾隆閒諸生嗜學工詩  
中年失明

漱亭甲乙詩集二卷寧化張軾著雷鎡序云余夢游一亭竹林陰翳葱翠  
交映一人坐而起視之則未瞻也余驚喜曰聞子已物化今竟在此耶  
子於詩何宗曰無所宗宗吾心耳公許爲我序何吝一言余曰近爲文  
甚艱非中有醞釀自然而出之求一語不可得於子宿諾久矣於必踐  
顧無散佚乎應曰友朋閒雲客手鈔必多覺而知爲夢晨起卽書之卽  
以爲未瞻詩序詢雲客果藏其詩若干卷云案軾乾隆閒貢生

墨莊季子古文集一卷寧化劉文謀著文謀字以燕乾隆閒諸生與兄文  
賢文謙齊名雷鎡目爲二劉

魁廬集十卷長恨集騷餘集寧化巫近斗著近斗字亦侯江西魏禮稱其  
古貌古心古學以上二人見道光通志

愛廬詩稿寧化劉文謙著第文謀序云予兄弟四人皆從先君學詩仲兄



受廬才最敏捷積二十餘年兄詩日多雅而鍊婉而多風恢恢有餘宜乎傳也案文謙乾隆閒諸生

石濱堂詩文初集二集永定盧欣松著欣松字仰喬貢生乾隆閒分修志乘襄建鳳山書院所著詩文集尙有第二集未梓

竹隱軒詩集十卷存遺一卷連城謝上霽著上霽字映川乾隆閒諸生常從童能靈游工吟詠善繪畫遺稿甚富童積超爲之編次

西園酬唱集連城林洪憲著洪憲號逸山乾隆閒貢生生平樂道人善著譚餘雜記自道學儒林詩詞歌賦以及一材一藝一言一行之可傳者無不備以上三人見道光通志

寓寓亭詩存八卷寧德許若梅著阮芳潮跋云霽林與余同里同學古詩規撫韓杜近體亦能俯視時流案若梅乾隆閒諸生

雅歌堂文集二十一卷外集十一卷建陽徐經著石遺室書錄云經字芸圃乾隆閒一老諸生自號堯坪居士文集又名慎道堂文鈔經深於經



學史學文亦具有法度不落平衍說經如以泮水之鴉當爲鳩子上之母爲生母庶氏之母並非子思之母最爲的確他如讀鴟鴞東山諸詩不知管蔡武庚未叛何得遽稱爲罪人僅知流言由管蔡何得爲罪人斯得何待居東二年讀斯于末章不知五字非韻駁歸震川引曾子問近於武斷論史則多特識如讀豫讓傳讀揚雄傳書蔡邕傳論出師表論蘇文忠答劉沔書序朱子楚詞集汪之類皆見人所未見外集爲左傳兵法左傳兵訣孫吳兵訣春秋禮經春秋書法凡例胡氏釋例左傳歌謠左傳精語外傳精語公穀精語國策精語讀左存愚詩說匯訂朱子事彙纂言朱梅崖文譜賭棋山莊餘集云芸圃私淑朱梅崖其古文氣學詞清無慚作者

楚游剝草侯官林徽瓊著自序云游楚十年頗事吟詠今夏雨窗取所存稿刪削補綴得若干首都爲剝草道光通志云字長容號庚生乾隆間伯兄崑瓊作宰湘南迎養其父官署徽瓊隨侍故集以是名集中如梅



影詩三十首雁字詩十六首皆與其季弟瑞瓊猶子初聚首衙齋一家酬唱之作也

書帶草堂詩鈔二卷侯官鄭廷泣著石遺室書錄云廷泣字慕林藏書甚富長子昌英有名於時嘗刻注韓居七種書行世足訂諸家之誤是集爲閩縣謝發川氏寫刻本大略五言學王孟

祝東巖遺詩一卷浦城祝昌泰著雲寥山人文鈔云予見其所刊浦城遺書十三種與謝臯羽晞髮集論知太守尙義疎財尤留意風雅其二子廣生哀集太守遺詩數十首太守詩多散此帙鈔自朱春門處甚屬寥寥予謂太守近又彙刊呂新吾四禮翼以下善書十種而自著詩稿不自收拾其用心非近名者所可及

鄭在謙文集福建鄭在謙著林希五文集云予友鄭君在謙梅崖先生之高弟子也師梅崖先生十年先生嘗有類我之目其文皆由中而出不爲粉飾而其恬淡紆徐之致則如春雲吐岫秋水澄波若無意於文者



翼齋偶存一卷課餘續錄云卷首不載姓名卷旁有浚雲閣字考其祭姊  
文知其名變而姓則終無可考矣所作多在尤溪蓋爲尤溪開山書院  
主講縣尹焦君其同年生也祭姊文深情宛轉聲淚俱下此篇最佳餘  
則塗澤應酬壽文壽聯哀啓尺牘無不入集猥雜甚矣自述弱歲入鰲  
峰歷從林巖沈楊孫朱諸夫子遊想稔聞著述之風而未深析其門徑  
其人當在乾隆中葉時也

林希五先生文集二卷閩縣林雨化著石遺室書錄云希五本工時文亦  
用力古文文筆清矯惟此集徑名古文初集似古無此例趙士泉序云  
在戍所數年赦歸示子所撰古文數十篇悲壯沈雄又有詩數百篇如  
其文亦以難後益工案雨化字希五乾隆戊子舉人

榜村集北征集龍溪昌錫晉著道光通志云錫晉字耀西乾隆戊子舉人  
爲古文詞有法度詩清雋得唐人風度

須菴遺集侯官鄭際唐著石遺室書錄云際唐字大章號雲門開極子卷



二多恭和御製奉和諸皇子詩案際唐乾隆己丑進士

賜硯齋詩鈔四卷寧化伊朝棟著石遺室書錄云前有紀昀曾燠二序近體風華掩映古體文從字順未有書尙書古文孔傳後七古一首以僞古文爲真力詆闕百詩之說並無確證蓋於考據之學未有得不必以此等議論入詩也紀昀序云偶有所感輒發於詩扶質立幹垂條結繁是真詩人之詩而非詞人之詩矣案朝棟乾隆己丑進士

竹佃詩略三卷竹佃閒話錄三卷閩縣林芳著石遺室書錄云芳乾隆庚寅舉人詩近體清脆在香草齋小倉山房之間說鬼六首頗似梅宛陵心虛齋集二十二卷閩縣鄭洛英著朱仕琇序云耆仲詩脫稿者至千餘篇其至者蒼鬱孤清得古人之神理餘不廢摹擬要皆有才緯於其間殆所謂能自見者歟生意思蕭散脫落蒂芥一以真性往來蓋善全其才者今方銳志古文問業於余夫詩古文雖異業其歸則未有一者

也案洛英乾隆庚寅舉人



鄭西瀟詩稿一册鄭洛英著石遺室書錄云詩不過數十首中賦一首試帖及詠物詩居其十之四五如秋興八首老柏行用杜韻皆錄杜原詩於後殊不必矣

澹靜齋文鈔六卷外編二卷詩鈔六卷閩縣龔景瀚著射鷹樓詩話云先生全集爲昌彝校定文集八卷邶風說三卷祭儀考四卷說禘二卷離騷箋四卷循化廳志稿八卷悉先生所手定其屬稿而未成書者孔志禘祫考讀書錄其若干卷皆說經之主臬也先生幼讀書日誦數千言文集多軍旅之作撫議平賊議堅壁清野議諸篇率皆洞達治體繞暢方略太乙舟文集云建寧朱梅崖先生以古文詞名乾隆間龔海峰先生其受業弟子也海峰先生不以考證名而其爲文沛然暢達申論辨經史往往得其指要固有爲考證學所必取者其論時事如論臺灣之招撫論甘肅鹽法歸地丁之得失論甘肅省垣宜建於涼州其議川楚軍事機宜議剿議撫堅壁清野皆實事求是控制合度其後川楚奏凱



卒以堅壁清野成功秦金門跋云以歐陽子之心情具蘇長公之風力其爲文恣肆豪邁歸於純篤詩性真激發諸體畢備案景瀚號海峰乾隆辛卯進士

鶴井集一卷後鶴井集四卷書屏文鈔一卷閩縣郭文誌著石遺室書錄云文誌字可典號書屏集名鶴井者乾隆戊申自識云西陽雜俎載鶴鳥繞旋飛謂之鶴井余奉差由海赴閩回時取道建溪度嶺旋浙週轉如環客中記程得詩因以鶴井名集名後鶴井者嘉慶丁卯自識云采銅於滇往回二萬餘里亦如鶴鳥之繞旋飛也前有朱珪一詩紀的一序皆文誌受知師後有阮元李麇芸伊秉綬各序跋秉綬以爲可與在杭能始諸前輩抗行云案文誌乾隆辛卯舉人

南陔集侯官林澍蕃著汪韓居詩話云香海少孤母鄭氏荔鄉先生女教以經史及漢魏六朝李杜韓蘇詩過眼輒不忘九歲學爲詩出語卽超凡俗卒年僅二十有八詩數百首太抵一氣呵成無摹擬之迹五言勝



七言古體勝近體其根柢蓋得力於唐以前者課餘續錄云予舊有錄本今亡矣其詩拂拂有靈氣案澍蕃乾隆辛卯進士

存庵詩集八卷建寧謝恩臨著吳尊盤序云存庵五言古詩直取陶謝之長五七言律詩有唐大曆貞元人風格案恩臨乾隆丁卯舉人

秋坪詩存十四卷閩縣陳登龍著石遺室書錄云古近體皆仍前明閩派不力求鮮新深刻以自異李元敘言曹能始吐納漢晉謝在杭兼綜潘陸朱竹垞謂其依然十子風調明詩七變閩風不易秋坪所宗在是云云殆確論也案字壽朋乾隆甲午舉人

陳秋坪先生遺墨一卷補錄一卷題詠七卷古田甘澍緝石遺室書錄云前二卷秋坪先生遺墨皆與澍倡和者後七卷友朋題詠澍所徵集而編輯成書者澍字滋蒼秋坪門人中附有雲坳水曲山房圖水木清華園侍師圖小照承歡圖小照前有梁章鉅序陳壽祺撰傳秋坪手書詩四首門人何鄂聯跋記錢塘金應麟記秀水莊仲芳南陽繆梓跋各一



首

蜀行偶草二卷永定溫恭著王昶序云我邑溫明府以運餉入蜀自陝而踰漢中抵成都泛江而歸道路之所經大率與王文簡相等然文簡奉使典試時蜀道之平已逾二十年若明府之行爾時篝火鳴狐伏戎於莽往往慮道路之梗而明府辦裝而出竣事而歸乃能據鞍落筆歌嘯自如往來半年得詩一卷而從容嫺雅絕無跋前疐後之意案恭字益堂號荔坡乾隆甲午舉人

四留堂詩集侯官盧遂著注韓居詩話云霽漁年十三卽能詩一年成一集法律音調並美案遂字易良乾隆乙未進士

素村小草閩縣吳玉麟著自序云弱冠以來家資纍鉅萬不數年盡散去壯歲登公車蹤跡西抵玉關東臨碣石北極幽并南窮吳越浮江淮登秦華渡黃河者五泛滄海者三以廣文徵官還鄉鯁直取忌譴謫隨之悲夫因分體彙編付茲剞劂俾後之覽者略知梗槩云石遺室書錄云



近體詩口吻輕倩集中有與黃莘田往還作宜其詩筆之相近也古體亦不下於莘田惜交游太寡詠物詩太多若南臺竹枝詞臺灣雜詩公車雜詠一百首西湖絕句皆有故實可采者玉麟乾隆丁酉舉人

杜詩注垂老詩集閩縣陳烺著道光通志云烺字士輝號東村文法莊列詩宗杜韓兼工倚聲早歲著有紫霞巾花月痕傳奇行世舉乾隆丁酉舉人官德化教諭不半載謝病歸授徒自給多所成就老病日問業者屢猶滿戶外卒年七十餘子登瀛嘉慶辛酉進士官中書孫庚郡博士弟子員俱負儁才善承家學願皆蚤世故所著多散佚不傳其晚年詩文集皆門人爲之輯刊云

鷲音集二卷光澤高騰著抑快軒文集云嘗聞諸先人曰五古宜學漢魏以逮盛唐其餘則視其材質所近雖中晚唐及兩宋學皆可以有成也先人之訓蓋自道所用力也周凱序云曰鷲音集者取莊子齊物之言天籟之最初者謂真氣彌滿純而未漓惟最初爲然也案騰號海樵乾



隆丁酉舉人

官志齋文鈔侯官官崇著二勿齋文集云述言初學古文於梅崖先生而得其矜慎然所志在力行志齋文實多而華少矣顧不欲多作所自我擇存者僅二十有八篇觀其文其性情志趨可識也案崇乾隆己亥舉人

觀瀾堂詩鈔十一卷侯官郭振圖著課餘續錄云閩海人文首載是書鈔本振圖字紹俠號咸山乾隆己亥舉人梁上國序云古近體踔厲風發氣骨稜稜遠步趨於山谷近則爲吾鄉鄭少谷之嗣響

潤園文集六卷詩集八卷建寧余春林著李俊序云潤園集詩高者辨香六朝及唐尋柳二家次亦恪守唐音不落南宋雜家之習案春林字穎源乾隆乙酉舉人

芙蓉臺詩鈔永定吳登瀛著余春林跋云白漁子詩清壯俊麗古體學魏晉近體法唐人案登瀛字翊唐乾隆己亥舉人



雁門集箋注八卷侯官薩龍光著石遺室書錄云龍光字露蕭乾隆辛丑進士天錫其遠祖也是汪熟於元人載籍可匹施國祁元遺山詩注

侯庵文稿侯官陳大煜著道光通志云大煜字含耀號俟庵乾隆癸卯舉人少工書及詩古文詞受知於大興相國朱珪力爲揚譽名滿京都澹於仕進放懷詩酒以終子茂堅邑諸生與修續通志長樂陳庚煥稱其博雅有奇氣得家學淵源云

守駿齋存稿順昌陳琬著汪韓居詩話云東郊侗儻不羈有山川癖與陳秋坪黃澗賓交好結文酒之社詩近體不多作七古學韓蘇案琬字鴻章乾隆癸卯舉人

林忠園詩鈔閩縣林茂春著二勿齋文鈔云忠園質近魯而好讀書視經史子集如性命詩沈博宏肆其七言古體時出入於韓蘇存稿頗多錄其尤者案茂春乾隆丙午舉人

日華樓詩鈔四卷焚餘稿一卷閩縣薩玉衡著石遺室書錄云雄俊飽滿



與陳左海並駕齊驅左海序稱其駿偉廣博譬諸快劍長戟之撞秘菁  
鐘大呂之鏘洋又云遠與虞楊范揭四家接武竊謂四家中與楊最相  
似虞則僅似其七律范揭則並不相似也案詩鈔本六卷燬於火只存  
前四卷後梁葆鄰先生招入燕花吟社新作日增皆在前鈔之外詳退  
菴詩話云玉衡號檀河乾隆丙午舉人

白華樓詩鈔箋注閩縣薩大年著林昌彝序云先生哲嗣蘭臺舍人多聞  
博識今讀舍人白華樓詩鈔箋注旁搜博采繁簡適中如汝陰王詩經  
引南史宋武帝紀又引困學紀聞云魏之篡漢晉之篡魏山陽陳留猶  
獲考終亂賊之心猶未肆也宋之篡晉踰年而弒零陵不知天道報施  
還自及也又如吳高陵詩據盧氏墓辨謂堅葬曲阿後遷於吳史不及  
詳載爾皆有以發明詩意而不至於穿鑿附會諸如斯類不勝枚舉

盟白齋詩長樂劉永標著左海文集有序云先生詩最工者游姬巖諸作  
鏡刻獨造於少陵石匱閣鐵堂峽諸篇爲近五言沈體所稱秀語奪天



亦及書云云  
綠善於繪難狀之景達難顯之情其他皆清健可誦同時林竹佃鄭西  
澧涵山各以詩名先生常與往還所爲詩亦上下相角逐才情空涌如  
越王石樽聯句足窺一斑惜余幼卽知先生老而終不及識魯山徒由  
其詩以想見其人也案永標字次北乾隆丁未進士

二勿齋文集六卷侯官謝金鑾著石遺室書錄云高雨農序稱其淪浹道  
妙察觀民情物變協於治體能使淺者愈愚柔者起懦澆者革薄亢者  
釋矜竊謂文理切實與浮夸者迥異此集各種散文外第五卷爲詩鈔  
小傳前有首卷附錄像贊題詞及事實案金鑾字退谷乾隆戊申舉人  
櫻桃軒詩集侯官謝震著賭棋山莊文集云先生所著雜詩獨完其孫淡  
人秀才重行劄劄案震字甸男乾隆己酉舉人

留春草堂詩鈔七卷寧化伊秉綬著法式善序云少作多幽潔之篇官西  
曹多雍容之什居粵多峭厲之詞境屢變詩亦屢變云石遺室書錄云  
筆情娟秀而時作渾成雄邁語秉綬字組似乾隆己酉進士



炳燭齋詩集無卷數霞浦游光繹著賭棋山莊餘集云彤白先生詩磊落有奇氣側聞集係先生手寫讀其詩頗以去官爲失意此則志士思有爲與汨沒世味而冀望富貴者不同也况又益之以飢驅哉子大琛字漫郎跌宕擅文采嘗見其萍緣小記蓋計偕過姑蘇有所眷戀之作散文二千餘言隨筆抒寫不冗不蹶隱名自稱方小玉案光繹乾隆己酉進士

青聖詩鈔十卷青聖讀史雜感十三卷侯官鄭大謨著石遺室書錄云大謨字孝顯讀史詩由周至隋皆七言絕句每首下皆有自注惟多不載出處有時又著書名詩鈔多自注多有敘可資考證如寧陵甲貞烈張荀氏一首則詩史也自序云青聖詩傳家故喜作詩工不工弗計也近來又多俗殊非本來面目吏俗詩亦俗也俗仍付刻滋懼吾家學之墜也閩詩人少谷子九世孫自序案大謨乾隆庚戌進士

張孟詞遺集一卷寧化張騰蛟著汪韓居詩話云孟詞生平不多作詩作



亦隨手棄去卒之前日乃自訂古近體二十餘篇部郎金蘭畦光悌持  
去無副本後從楊二樵孝廉收得數十首射鷹樓詩話云古文詞源出  
秦漢駢體文迫近燕許案騰蛟乾隆癸丑進士

把園山莊稿餘一卷永福鄭汝霖著耕邨姑留稿云鄭鐵侯前輩藏書數  
萬卷且好購名人書畫及金石碑誌搜羅甚富晚年俱燬於火作有十  
哀詩其文已燼其詩僅存見解甚超脫案汝霖乾隆乙卯舉人

注韓居詩鈔二卷侯官鄭杰著石遺室書錄云有自題注韓居寄諸同志  
一首並自注述福建全省自唐迄明詩人甚詳

彙書六卷仙遊王鳳九著四庫全書總目云是集自序謂倣笠澤叢書之  
例故以彙書名之中多講易之文其說皆宗程朱詩則有韻語錄也

出門吟龍溪李贊元著贊元字匡侯於閩越燕齊勝水奇山靡不周歷  
章江草八卷福鼎王世昌著世昌字面城性穎悟讀書數行俱下十齡能  
吟詠喜作畫詩宗少陵畫倣南宮極力揣摩臻其堂奧



西村詩集武平李槐軒著槐軒性恬靜古樸善書工詩隱居西村別墅  
商村詩集大田范際弼著案際弼字聖輔少孤折節讀書跌宕文壇性嗜  
琴愛客花晨月夕與賓友流連詩酒人稱其高致以上四人見道光通  
志

林研莊詩集龍巖林研莊著天真閣集云研莊弱冠時自閩來吳學詩其  
叔遠峰卽已丁當清逸詩壇旗鼓傾其座人已而自謂無與於性情也  
乃悉屏其聲律比偶之習感時觸物一以自抒其情志而於思親懷友  
之什尤纏綿悱惻一唱而三歎焉案研莊佚其名

齋粥山房詩鈔侯官陳春波著谷際歧序云陳君滋田余薦諸南宮者其  
詩言及骨肉則沈痛出自肝膈案春波乾隆庚子進士出宰湖北利川  
縣剿白蓮教匪有功賞知府銜

注經堂駢體文集詩詞一卷沙縣鄭大壯撰道光通志云大壯性孝友乾  
隆戊申嘉慶甲子兩中副榜工書法自言得力於米海嶽精篆刻章法



腕力兼江皜臣林公兆之勝



福建藝文志卷六十六

集部二

別集十二

疎影軒遺草二卷閩縣何玉瑛著石遺室書錄云詞筆英挺驟讀不似閩閣中人語却的是閩閣中人語古體極見用意所謂詩中有人在也詠史諸作尤有特識前有山陽汪廷珍鄉人黃世發二序陳壽祺詩話一則後有陳登龍陳庚煥子媚陳元奎會稽茹棻各一跋寧化吳賢湘一傳男鵬程鵬翮等撰行略

聊以拙齋詩文集閩縣鄭鵬程著射鷹樓詩話云太守嘉慶丙辰恩科舉人幼得母教詩真樸有味左海文集云咏史諸作瀏灑頓挫不主故常道塗雜詠多琅琅可誦

第五居士文集光澤何長載著怡亭文集有序云厚莽少時有志古文既而自謂非其性之所近遂改習偶體抑快軒文集云厚菴詩與金門相



伯仲而文專學徐孝穆雖駢體也而儵然有自得之樂厚菴字任君嘉慶戊午舉人溫雅淡仕進以兄弟行第五又號第五居士卽以名其集云

六亭文集十二卷德化鄭兼才著石遺室書錄云集分三種宜居集三卷愈瘖集三卷雜著六卷宜居愈瘖二集皆公事文字宜居者取居卑居貧惡乎宜乎之意愈瘖者取晏子對齊景公下無言則謂之瘖上無聞則謂之聾之意雜著則各種雜文多紀載邑中人物悉具先民矩矱惟時有志銘不著其人之里居與傳中著人里居而稱古地名者集中附載汪瑟菴陳恭甫辛筠谷諸先生評論雖有非議者不諱與世俗槩列諛詞者迴不侔矣抑快軒文集云堅碩茂美讀者可自得焉兼才字文化嘉慶戊午舉人

鄭六亭詩鈔鄭兼才著一勿齋文集云六亭以己酉選拔補教諭詩不爲崖岸而神骨堅秀全稿頗多錄所不余者殆三之一云



左海文集十卷閩縣陳壽祺著石遺室書錄云前有阮元許宗彥高澗然  
諸序壽祺於經史羣書無不貫通精熟故考證辨論之作觸處洞然沛  
然文字似亭林竹垞而心思沈細人所忽略讀過處獨能推見至隱層  
出不窮則亭林竹垞有所未及如妾母禮說答翁覃溪學士書答許子  
錦論經義書與臧拜經辨臯陶謨增句疏證書答臧拜經論鄭學書與  
梁曜北書與王伯申論古韻書答李太守論周尺漢尺書諸大篇皆是  
其與阮儀徵書自謂作古文詞務去俗而不求異惟達其所欲言而不  
沾沾於伸縮搏掄之工亦可謂自知之明言不至於不掩惟閒喜用事  
終近駢體如古文尙書條辨序有云拔趙幟從劉袒挽如林之旅爲釋  
甲之徒斥驪駒爲狗曲毒湯武於馬肝臺灣縣學教諭鄭君墓志銘有  
云強者或昧雉其子弟其餘急病讓夷之風高足負米之類時時而有  
若朱文正神道碑答張亨甫書則通篇駢儷之詞當入乙集矣至與何  
岐海書謂福建當仍稱閩不當改稱東越實千慮之一失據云逸周書



周初之東越惡能賅今福建一省之廣輪秦始改置郡縣閩中郡名是爲鼻祖漢封無諸因號其國爲閩越今無諸祠廟諸故蹟盡在吾鄉證據顯明奈何推而遠之史記稱東越列傳漢書稱閩越列傳其文皆以閩越發端蓋漢之東越實併閩越東甌之地而王之謂古閩中方域不止若今福建所轄州郡可也謂今福建不得居閩之號則大不可謂閩越東越隨文互稱可也必專東越而廢閩越之名則益不可云云夫旣云東越閩越福建可以互稱則固原本逸周書何福建明明東越矣乃必不敢辭閩之名者曰此秦之所命而漢因之者也夫亡秦蔑吾東越之名而誣我以閩亡秦果何所據者今不信周初周公之稱名而何亡秦誣我之名以爲鼻祖亦俱甚矣漢之君臣不學漫不加察而因素之名如之何其不可廢邪且太史公卽不何福建爲閩越也稱閩越者一王之制而列傳標題則稱東越此史公之特筆可以繼春秋非班孟堅所及者也奈何不從史公而從孟堅邪無諸祠廟自存而存越之名廢



閩之稱則可何所謂推而遠之此不可不辨者案壽祺嘉慶己未進士  
左海文拾遺一卷陳壽祺著課餘偶錄云遺文廣東鄉試策問五道蘭州  
府知府龔公家傳刑部尙書陳公墓志銘共三篇高兩農曰古人策問  
多人集今體制不能如古似不必存又曰家傳頭緒頗繁風神彌逸其  
行文有收有放有節制並取法於史漢而取格於承祚故優游有餘如  
此諸篇或已刻本集或謂左海文與鮎埼亭相近此語不爲無見

左海乙集駢體文二卷陳壽祺著石遺室書錄云壽祺有文集十卷又有  
駢體文乾嘉以後袁子才孫淵如洪稚存輩皆然此集卷首有張惠言  
吳鼐兩人題詞張云清麗似梁人溫潤條暢質有其文任彥升之儔特  
古樸少遜之耳平臺詩序一篇格律止是唐人而其雄偉卓犖若駿馬  
在街罄控如舞擬之燕許何多讓焉吳謂句法字法浸淫於任沈江鮑  
四家於巽軒季述外又逢畏友實則作者才學淹博故能無對不工無  
聯不整所謂四圍皆王母靈禽一片盡嫦娥寶樹者猶遜其妃青儷白



儀鄭堂問字堂固不爲其密矣

絳跼草堂詩集六卷陳壽祺著石遺室書錄云卷首不翁尊溪宋芷濟吳山尊吳蘭雪鮑覺生薩檀河姚石甫高雨農張亨甫各題詞皆推挹甚至實則七古多平仄轉韻七律中兩聯多填滿不用虛字如趙松雪所稱大略才雄學富遠與卧子梅村相伯仲近則挹拍檀河擬以阮亭竹垞則所謂不於倫者也

勞薪集一册無卷數長樂梁運昌著石遺室書錄云運昌字曼叔原名雷嘉慶己未進士官編修一生做精力於杜詩著有杜園說杜而所作却不盡學杜此册有自跋言二十五年間僅得詩百首中塗改頗多題金樓子後七古一首贈黃葉僧道暹讀孟東野詩五古兩首最佳嘉慶聖德詩七十韻殆七古之最長者

秋竹齋別集十卷梁運昌著課餘續錄云其自訂詩文皆稿本吾友王叔蘭秀才曾從太史游芷鄰中丞太史之從弟也叔蘭因挾其師遺集因



緣得見中丞中丞爲刻其秋竹齋詩今外間所傳本是也

杜園說杜二十卷梁運昌著石遺室書錄云運昌號曼雲又號江田爲九  
山太僕之姪芷林中丞之兄注杜詩者號稱千家謬誤者不少是書其  
晚年所纂爲秋竹齋本道光五年告成觀其敘例自言爲一生最得意  
之作經三易稿手自鈔寫行楷極工整卷一至卷七爲五古卷八卷九  
爲七古卷十至卷十四爲五律卷十五卷十六爲七律卷十七至十九  
爲五排卷二十爲絕句運昌遺書多在其壻何廣憲處何氏藏書久已  
散失此書今藏陳澧庵太傅處缺第十四卷又附錄尙有四卷曰杜譚  
上杜譚下曰批摘贗詩附未錄詩曰年表敘例目錄題辭今皆不傳又  
秋竹齋尙有杜園臆說全帙亦自錄者亦未見此書考訂事實實有見  
人所未見者糾正浦氏仇氏錢氏各家謬誤處甚多如謂少陵實卒於  
岳州不卒於耒陽陷賊時實藏匿贊公大雲寺嚴武在蜀無欲殺杜老  
事此類甚多皆精確可據論詩亦多特識讀杜者不可不讀之書也案



此書似可入詩文評然所說爲整部杜詩故與韓文故李文讀並列別集

韓詩細東坡詩鈔梁運昌著課餘續錄云見解議論皆能自出手眼非  
隨聲附和者比

許戶部詩聞縣許鏗著左海文集云君與余同縣籍而家於無錫其詩幽  
秀諧婉得風雅之正其颺流所自發源康樂在唐則劉希夷綦毋潛常  
建劉昶虛諸家最爲近之雖嚴自芟削所存不踰百篇然其尤者可以  
傳矣案左海序又云同年許元孟由翰林改戶部主事查左海同縣同  
年姓許者惟鏗後官直隸知州

歸田稿四卷惠安孫珩著道光通志云第一卷第二卷皆詠古人事蹟蓋  
倣黃氏讀史吟評例也人各七言律詩一首詩後皆存跋語始賀知章  
終王朴其中不分時代第三卷論若干篇第四卷雜著若干篇案珩嘉  
慶己未進士



甚德堂文集四卷寧化吳賢湘著抑快軒文集云吳徵君涇夫勇於名而嚴於利今集中載兩漢君臣論讀五代史諸篇析義利之介以翼經術道而衷於身耕材姑留稿有序云或刻峭奇崛爲周秦之諸子或往復低徊爲史漢之論贊或疏明詰訓批導理蘊爲經師之箋注爲古賢儒之粹語格整而嚴筆簡而潔案賢湘字清夫嘉慶己未進士

秋風紅豆室詩鈔一卷吳賢湘著龔聯輝序云先生自訂本也初學漁洋變而爲山谷再變而爲香山玉局晚乃浸淫工部焉

怡山館詩鈔四卷侯官朱錫穀著石遺室書錄云錫穀字菽原嘉慶辛酉進士詩分瞻雲草上下隴蜀遊草歸雲草詞筆雄整可以見事擅河第畜秋坪

綠筠堂菊花詩二卷焚餘草一卷浦城朱秉銘著簡經堂類稿云字緘三雪龕其號其詩分爲四品黃品凡六十三種白品凡六十九種黛品凡七十二種紫品凡六十三種有已詩者有未詩者案秉銘嘉慶辛酉舉



人中年失明性愛菊捫葉聞香卽辨其種

抑快軒文集乙編四十八卷丙編十六卷丁編九卷光澤高澗然著石遺室書錄云首有建寧張紳仁和陳善富陽周凱三人序張序稱尤嗜韓昌黎之文出入必挾以行陳序稱其爲文不矜才辨不尙奇特所言皆平易近情而清微淡遠之旨淳茂淵雅之氣埒流露於吐納噓噏之間周序推抱大過溷然文極似歸熙甫工於碑志傳狀短篇者尤工使節行之不易表傑者各有以見其面目精神所在而可信其無溢辭亦以難矣惟所作太多乏意味而不必存者時時有之陳發菴太保所藏凡數本此本最多謀將以付梓使余擇其尤雅者若干首名文鈔云賭棋山莊文集云文以養勝其體潔其氣粹平淡出之令人有悠然不已之思生平致力韓子而所得和易乃近於歐曾於歐去剽於曾去滯又云申如竭古錄序與李申耆書黃母李恭人周封公楊太淑人等傳皆極用意俯仰掩抑情摯神遠課餘續錄云文分乙丙丁三集而無甲舍人



曾著春秋釋經詩音論語私記諸書不欲列爲甲集故文集無甲也案澍然字雨農已見春秋下

韓文故十卷高澍然著石遺室書錄云澍然自有序稱治韓文三十年有待於心就全集刪其僞竄者用時式者脫誤不可讀者未醇者存二百九十八首加評注焉名曰韓文故又云公篤於倫達於治屢斥而不奪所守發爲文章其體易良其氣渾灑又足以載焉故雖尋常贈答之辭題記志傳之作按之鮮不器於道是編所評並發明斯旨其注則有資論世及考證者特詳而於世所稱無一字無來歷者不及蓋辭必已出公銘樊紹述墓言之而申之曰文從字順各識職奚必問所自哉易之元亨利貞書之欽明文思又誰作而述之乎案駁無一字無來歷說足以啓悟後學然微有語病辭必已出者忌用成語故二字以上者不必有來歷各識職者一字有一字意義却不可無來歷也是書有總評有旁批有眉批有夾行注注者注事實音義或篇後加附考多簡要明哲



如曹成王碑之曹誅伍昇爲敗則同曹並誅有獲則同伍分昇向無能  
解者此書與李習之文讀學古文者皆當家置一編賭棋山莊文集云  
雨農昔著韓文故用功甚深然其考訂史事不失詳贍若眉詮旁注之  
語則多染時藝家習氣閩雜記云何長繁太守爲之付梓藏板其祠庚  
戌祠燬板亦俱燼故傳本絕少

李習之文讀十卷高澍然著石遺室書錄云澍然自序稱昌黎之文廣博  
易良余於韓文故言之詳矣習之先生其廣博稍遜易良則似有進焉  
蓋昌黎取源孟子而匯其全先生取源論語而得其一至故余於昌黎  
猶爲公好於先生若爲私嗜然先生之文平澹不見可悅爰彙舊讀所  
得評成是書冀後進資以啓發可得同好先生全集盡在是其未卷九  
篇則擬刪者並錄之亦加評明所見無好而知其惡雖私嗜固不失爲  
公好也案習之文固易良然如昌黎行狀則廣博欲過昌黎澍然文則  
固學習之之易良者總評外旁批極詳皆由當質雅足以啓悟來學文



凡九十九篇卷十九篇乃擬刪者故無評語而自序乃云亦加評豈鈔者漏之耶王凱泰序云劉炯甫刺史取舍人是編付之手民同治十年福州刊本板藏光澤抑快軒

拾穗山房詩集閩縣林軒開著抑快軒文集云君詩溫文而淵雅君故詩人黃莘田先生離孫少受詩法於母大人推原所自亦漸於外氏之教者深歎案軒開嘉慶壬戌進士

退菴文集長樂梁章鉅著抑快軒文集云有清明和吉者有總攬橫貫者有坐而言已起而行者茲豈非實遂而光曄者耶案章鉅嘉慶壬戌進士

退菴詩存二十五卷梁章鉅著石遺室書錄云學於覃溪却不似覃溪風格與吳中七子相伯仲中有古五研齋所藏歷代書畫雜詩九十六首國朝書畫雜詩三十五首皆有自注可於論書論畫論印各絕句外關一大觀集首有翁覃溪曾賓谷諸人題詞皆不免推許太過



藤花吟館詩鈔十卷梁章鉅著石遺室書錄云此十卷詩至道光癸未年止退菴詩存別至丙申年止凡後十一年多十五卷其前十卷詩互有

出入

虞西山詩鈔邵武虞立中著石遺室書錄云立中字守和國子生嘉慶壬戌侯官謝金鑾爲邵武教官稱其詩深有得於陶後博涉魏晉六朝云耘芳亭吟草二卷閩縣何青芝著張亨甫集云弱冠舉嘉慶甲子鄉貢詩多自抒胸臆之作錄十八首詞二首藏之射鷹樓詩話云詩不多作然出於性情不失其爲風雅案青芝號玉田年四十一賫志以歿耘芳亭一作耘芳堂

效顰集二卷侯官洪龍珍著射鷹樓詩話云閩秀洪秋崖字蘭士爲許梅生孝廉宗元室夙耽風雅詩筆清婉案宗元嘉慶九年舉人

惕園先生全集十九卷長樂陳庚煥著姑留稿有序云林祖瑜嘗取其自訂文稿印諸聚珍版迄今二十餘年有志之士思欲購求弗可得咸深



惜之道光庚戌冬同門友閩邑何廣文道甫與先生文孫復謀刊刻先生族子楠齋並補輯其書札筆記雜著及詩集而以事實附焉適遇同邑馮君壽臣喜其事之足以嘉惠後學也踴躍贊成蓋先生學甚博尤篤信乎宋賢五子之書務實踐而恥爲空言與生徒談經論史隨事誘掖必使親切體認諸其身其他手纂羣籍百有餘種尙藏之於家藍水書塾文章云初稿十六卷外稿一卷詩彙二卷遺稿八種石遺室書錄云先生字道田嘉慶初歲貢生世居會城鼈峰坊見聞淹博讀書時有得閒處尤熟於鄉邦掌故文章亦扶質立幹絕無蕪類

寫意齋詩草  
林濡庭著楊園初稿云濡庭先生吾友也其談藝實吾師其爲詩務自寫其性情不屑爲時趨以悅里耳自弱冠學詩凡三焚其稿是集所存皆伐毛洗髓之餘存什一於千百以自見其意寫意云者言志之謂也壯耀魏科一試南宮報罷卽翻然歸養

樟汀詩草十卷十九山房詩鈔二卷將樂廖倬傳著道光通志云倬傳字



萬英自署蔓茵詩負重名以明經老家案偉傳嘉慶初歲貢

靜安吟草長樂樂韻書著課餘續錄云梁太常三女次女蓉函韻書詩筆足以函蓋閨秀太常拜奉天府丞子女隨任蓉函後又隨其夫許明經濂客承德兩次出塞得江山之助多葭鄰中丞閻川閨秀詩話首有蓉函序詩已錄卷中或謂詩話皆出蓉函手筆讓於其兄

獻雲山人文鈔同安林樹梅著抑快軒文集云是鈔多鳳山幕中作樸實論事真切說理不事張皇生氣不匱案字瘦雲同安金門人

靜遠齋詩鈔林樹梅著抑快軒文集云詩多奇氣悲壯蒼鬱近秋笳集

朱笈樓詩文鈔初集浦城朱笈著雲寥山人文鈔云詩文皆直抒所見而具有真氣流貫

傲帚齋初集七卷續集三卷光澤何長詔著抑快軒文集云金門天資絕人自童年嗜爲詩積二十成是集初侈於才繼範於格已而思去華根味於無味以幾於詩之正則者而自惜茲彙之未臻於斯也日月初集



射鷹樓詩話云茂才平日論詩辨香竹垞兼采心餘案長詔嘉慶閒諸生

八角樓詩集十二卷光澤上官紫鳳著柏硯山房文集云何願船刑部以其親上官宜人稿見示清醇真朴無纖俗之病其詞則多遠道憶父母之作夫內夫家外父母家以義言之耳若發乎情如古賢女思歸見歌詠者固三百篇之所錄也何秋淵跋云族伯母上官太恭人好讀古人書其於漢魏樂府尤嗜濫及明初諸家無不寢饋其中其詩刊行既久板燬於寇所存十之一二耳

陟瞻居士詩集建寧黃宗倬著抑快軒文集云蓋才與情兼者案字倬人小峩峩山人詩集三十三卷歸化謝紹謀著吳賢湘序云山人總角卽以古學受知於朱竹君先生補諸生屢試棘闈不售以貢入成均其所著隨專隨體立名凡爲集十六山人字大逸

深柳讀書堂存稿建寧何日誥著抑快軒文集云建寧何君紫來與李君



古山並出朱梅崖先生門李君數爲言君古文得太史之傳繁字梓嶽  
嘉慶間貢生

二樂堂詩集建寧丁汝恭著射鷹樓詩話云丁樸夫廣文詩其秋夜書感  
置之薛君來楊夢山集中幾無以辨

湖海詩存二卷官粵吟草二卷連江陳肇波著石遺室書錄云官粵吟詞  
筆較老肇波嘉慶戊辰舉人官來賓縣知縣

郭大理遺稿八卷莆田郭尙先著魏茂林跋云先輯其詩二卷散體文二  
卷繕校付梓繼復遴其駢體文二卷題跋一卷補遺一卷陸續付鈔適  
蘭石門人陶蓮生方伯聞林刊其遺集以所錄稿見示內有林所未見  
者因並爲刊入開雕於甲辰春至乙巳冬而竣龍巖魏茂林案尙先嘉  
慶己巳進士

增默菴詩二卷郭尙先著石遺室書錄云詩多七言近體氣韻清穩

慎餘書屋詩鈔六卷莆田陳池養著石遺室書錄云池養字春溟以進士



出宰頗有循聲詩穩而質分三集曰畿輔遊宦曰歸田曰三山避地爲  
初集曰玉屏濫竽木蘭泛寄爲二集曰莆陽逸叟則三集也案池養嘉  
慶己巳進士

雲左山房詩鈔八卷侯官林則徐著石遺室書錄云後附壽詩賀詩等一  
卷詞一卷前有謝章鋌一序公勳業彪炳而古今體穩愜流美幾欲媿  
美安陽石湖矣奉使滇中遇山厲水刻處寫景如畫案則徐字少穆嘉  
慶辛未進士官至總督

雲左山房文鈔四卷林則徐著石遺室書錄云此坊開印本分卷一二爲  
散文卷三爲駢文卷四爲雜俎其實雜俎中書跋居十之六七皆散文  
也

榕園文鈔六卷詩鈔十六卷潤經堂自治官書六卷侯官李彥章著石遺  
室書錄云文皆以道政事者不必與講義法者斤斤較短長詩分槐忙  
吟草一卷歸榿雜詠一卷都門舊草二卷榕園詩鈔一卷江山文選樓



一卷戀春園詩草二卷出山小草二卷雙石齋詩草一卷載酒堂集二卷又丕畧集名詩三卷饒有才華近體十之八九古體十之一二與楊雪椒先生絳雪山房集可相伯仲而自注中時有足資考證者抑快軒文集云李君蘭卿自彙守思恩所作權慶遠者附焉其治人事神興農育士弭盜招徠土司咸於此可考蓋君經世之書也又云蘭卿經世之書意懇而思周詞質而氣厚初無意於爲文凡有作求信於民而已案彥章嘉慶辛未進士

知守齋詩初集六卷二集四卷別集一卷龍溪鄭開禧著石遺室書錄云開禧字雲麓弱冠成進士由吏部郎出爲廣東糧儲道卷首各序言集分閨雞吹劍畫眉思荔歐荔諸名今卷中皆無有據吳蘭修序經自刪定爲十卷也別集乃試帖東溟外集有序云君詩用力魏晉以迄唐宋名賢持格甚正妙理清才都雅有則有明代諸公學古之善而無其失而憂時憫俗之心時露言表案聞禧嘉慶甲戌進士



亦佳室文鈔詩鈔四卷同安蘇廷玉著稽經堂類稿云平夷一策京中傳鈔已爲之紙貴至集中詩論兩書及夷患善後說練兵造船說擬善後自強議數大篇尤有關於禦寇安邊海內固未之見而足爲當世採擇者正復不少案廷玉字鼇石嘉慶甲戌進士官至總督

吳瑞人詩侯官吳聯穗著射鷹樓詩話云瑞人齟尹嘉慶丙子鄉榜詩多慷慨之音

履堂遺稿一卷侯官姚懷祥著射鷹樓詩話云履堂大令舊曾手訂詩草二十卷屬存一卷嘉慶戊寅鄉榜大挑一等捧檄浙西道光辛酉英夷竄入定海縣縣在海中央居民不及千戶援兵未至大令倉皇投北門外之成仁塘死難

晉安樂府一卷晉安蔣銘著石遺室書錄云銘字少陶嘉慶戊寅進士道光閒以舉人任安徽宰牧卓有政聲此樂府百篇專敘晉安遺事自秦漢至清雍正閒可資考證惜出處不注書名



散花丈室詩六卷長樂梁雲鏞著課餘續錄云梁太常三男季子蘭笙廣文最知名案散花一作天花雲鏞嘉慶己卯進士

生紅館詩詞一卷侯官周蕊芳著賭棋山莊文續集云蘭笙先生之配周夫人工吟詠

雲寥山人文鈔八卷甌寧蔣蘅著石遺室書錄云蘅喜考證之學如自書毛詩正韻凡例後書太瀆周氏刊本鄭氏詩譜再書三書皆抉擇頗當與丁樸夫論古韻書陳恭甫先生加有旁批而武夷偶述建州十二觀則游記之工者然如許秋史別傳等作學譚元春鍾惺尤侗而又甚焉案蘅字未齋嘉慶己卯舉人

雲寥山人詩鈔四卷蔣蘅著石遺室書錄云詩筆恬雅蘅喜游覽詩中小注閒有足補紀載者如宏光鐵礮歌黃華山歌仙霞嶺和周櫟園韻甲午紀事螽駘越銅鼓歌諸篇

愛卓齋集八卷侯官魏本唐著賭棋山莊集云勤於讀書徧點九經三史



發之於文博而不見其雜也容而不見其靡也氣勁而言遂有物有則於劉董爲近案字又瓶嘉慶己卯舉人

絳雪山房詩鈔續鈔三十卷侯官楊慶琛著石遺室書錄云雪椒先生嘉慶庚辰進士官至山東布政使內召補光祿卿心喜爲詩而不欲苦吟既歸田游覽所至留題殆徧

古山文鈔十卷建寧李祥賡著石遺室書錄云祥賡字舜廷邑廩生集中傳志諸篇皆貧賤無甚表見之人而言之能委曲有情味時時透過一層殆有得於李習之曾子固之用意用筆者

李古山詩李賡祥著六亭文集云皆自道所得無憤激語而歸於性情之正

怡亭文集二十卷建寧張紳著石遺室書錄云紳嘉道閒諸生文筆淡婉肩隨高雨農而較薄前十六卷爲各體後四卷爲福建通志稿左海聘充分纂時所作凡宋代列傳二十六篇爲楊時羅從彥李侗游酢范如



主魏掞之胡安國胡仁胡寧胡憲謝德權黃中美朱震何兌莫表深鄒  
斐黃中鄒應龍上官凝上官均上官恢上官渙西杜穎杜杲杜庶危昭  
德今道光通志所載皆非其稿蓋左海卒後某公推翻志局各分纂紛  
紛收回原稿而去今通志乃魏總纂敬中另修之稿也抑快軒文集云  
大抵言主立誠得有餘不敢盡之意周凱序云學韓文公而隱秀沈裕  
又似李文公歐陽文忠公此評似近溢美

怡亭詩集六卷張紳著石遺室書錄云詩學韋白兩蘇州得其平淡處前  
有高澗然一序何長載張際亮二序則駢體也高云怡亭靜者也其於  
詩牢籠萬狀歸於自得無所迎而悠然與之會無所拒而泊然與之忘  
無所倚著而浩然與之深似近溢美

愚若老人遺詩建安葉詔封著雲寥山人文鈔云刻意冥搜瑠瑤肺腑而  
出君雖苦吟類郊島而饒有神韻五言如未成中夜雨忽露一天星野  
水全吞壑寒雲忽放山無聲聞折竹有色但棲松傾耳疑聽雪開門半



是雲高渾自然闖入右丞之室矣又如潭蓄靜中聲山空物自聲更超  
超元著案詔封字紫泥

玉尺山樓遺稿一冊閩縣齊祥棟著石遺室書錄云祥棟未婚自盡近體  
詩數十首賦一首詩多詠物似皆家塾課作清順無疵其白蓮花一首  
見者以爲預識云

西雲文鈔二卷福安李枝青著石遺室書錄云篇數不多考證論事記載  
諸體皆文有其質與空疏者不同案枝青道光壬午舉人

呂匹邨類稿同安呂世宜著箱經堂類稿云吾友西邨耆學政古讀書自  
束髮識字寢饋凡四五十年治經先以聲音訓詁其於一詞一字古注  
有異同者必明辨而縷分之讀史則博綜上下判黑白別是非故其搢  
筆纒纒數千言其簡處則又一語不苟下余觀其論澠池論與夷及擬  
昌黎伯夷頌答李翊衛中行呂鑿山人諸作識見高卓即起唐宋諸賢  
亦莫不鎮至所撰碑志及傳記動與古會出入經史而不自知案世宜



道光壬午舉人

陳樸園遺稿一卷閩縣陳喬樞著課餘續錄云文三十餘篇詩古今體今試帖數十篇未編卷末校定蓋初稿底本也案字樸園道光乙酉舉人榕亭詩鈔四冊侯官李彥彬著課餘偶錄云未分卷出有太湖竹枝詞足考遺事又附錄女史林芳蕤詩則其祖母也山陰知縣其茂女贈江蘇按察司李開楚室案字蘭屏道光癸未進士

榕亭文鈔詩鈔詞鈔十七冊李彥彬著石遺室書錄云鈔本無卷數詩分荔莊行雲吳門燕游歸燕虹月船窺杜窓永慕軒還朝都門各集古體通暢今體清爽視榕園稍肩隨文多壽文祭文皆駢體散體雜文十餘首多考据之作

平遠堂遺詩五卷甌寧許厯皞著雲寥山人文鈔云卷繫一集門人許秋史所自編也補錄一卷乃其刪餘之草秋史齟齬卽喜吟詠天資清妙往往有中晚唐人佳句至乙未而詩境一變五言幽微淡遠具有王孟



韋柳四家神理至戊戌而詩境又變然醇而未肆也迨庚子辛丑則汨  
汨然來矣其曰蘭悟曰刺船者乙未歲與余談藝且誌成連之契也曰  
梅巖者戊戌歲始尋得劉屏山先生梅巖別墅思卜築不果因余愛天  
湖山宋處士黃水心舊隱自號天湖山人秋史遂以梅巖相印合也曰  
賓雲則己亥入武夷之作曰天風海濤則庚子秋嘗登鼓山絕頂觀日  
出云獨辛丑歲秋史出里門題曰巖扁莫測其意明年二月遂有仙掌  
墜崖之變殆其讖耶

鄔墨林遺草建寧鄔翰著怡亭文集云墨林於詩含清和明秀之氣其爲  
思也靚深其爲言也安雅爲人介介自持有志宋儒之學每爲詩閉戶  
終日過其戶外寂若無人居者抑快軒文集云墨林諸生天死於詩氣  
專而思遲見諸昆易言之或得之速輒不謂然及其成之也惟見泠泠  
清絕不類艱苦之爲者雖不竟其業然就其已至想見其可至案同里

張紳張際亮爲刊其集



竹素園集句二卷莆田陳淑英著石遺室書錄云淑英字德卿適道光乙酉舉人翁煥文中年寡有子兆蘭貢生兆熊諸生詩皆近體所集句自六朝唐宋以迨元明機緒甚清

知足知不足齋遺草二卷政和宋人傑著射鷹樓詩話云宋栢侯孝廉戊子鄉榜十一上公車不售發爲詩多幽愁怫鬱之音

天開圖畫樓文稿四卷石泉集四卷侯官郭柏蔭著石遺室書錄云集中時有福州掌故自序云出之甚易使人一目了然殆實錄也石泉集蓋古今體詩案字遠堂道光壬辰進士官至巡撫

蓉初詩集侯官謝玉漢著小石渠閣文集云謝秋植刺史從政有年其於政治之得失民俗之臧否無不了然於心故其於詩能治其性情以感發志意案玉漢道光戊子舉人

小芙蓉舫詩集四卷閩縣林仰東著小石渠閣文集云詩初學隨園及十硯翁余力勸其取法乎上子萊遂焚其稿肆力於漢魏三唐宋元明諸



大家道光壬辰舉於鄉計偕北上凡所過勝地名區必吟謳不自已詩筆愈蒼歸道山時年方三十有八所著讀史續記二卷雜錄二卷藏於家

林子萊雜文一卷浣紗石填詞二卷林仰東著硯鞋緒錄二卷詩有英偉氣少年學義山浣紗石長生殿之亞也

永陽游草一卷閩縣葉儀昌著石遺室書錄二卷字定勤道光戊子舉人詩數十首皆在永福所作蓋嘗構別業於其地也

外丁卯橋居士初稿八卷侯官劉家謀著賭棋山莊餘集云芑川初稿曰外丁卯橋居士眾不得其解芑川笑曰吾屢夢至一橋有外丁卯字過橋精舍十數楹或字予曰空空子曷歸諸視其對屋花木幽深門亦虛掩或曰此謝枚如所居也故芑川見予如舊相識自謂有夙緣石遺室書錄云詩格所心摹力追者似在薩檀河張亨甫諸人案家謀道光壬

辰舉人



摛經堂類稿二十四卷附齊侯壘銘通釋二卷晉江陳慶鏞著石遺室書錄云慶鏞字頌南道光壬辰進士門人何秋濤序稱詩賦雜文凡百三十有七篇乃乙巳以前所僅存與乙巳至丙午六月所作分爲十四卷先生精研漢學而服膺宋儒他著已梓者有齊侯壘銘通釋未梓者則三家詩考說文釋文校本古籀考穀梁通釋諸書門人龔顯曾序稱先生歿後癸亥遊京師於廠肆得何願船比部手訂籀經堂集底本編卷十四因復搜晚歲撰著舉所見所知者別輯二卷附爲補遺輒用子版排刷百十部傳之當代其所著三家詩考穀梁通釋均未見云光緒癸未門人陳榮仁序乃稱公嗣六舟兄弟以全稿畀榮仁爰仿原第釐爲二十四卷云案稿中有石經考異補二卷鐘鼎考釋一卷皆可單行者奏稿中有附鈔哀江南總目提要前編六十回不啻鄭俠之繪流民圖可備野史作料大略說經如六宗生民首章易林引詩各條皆有獨見奏疏則敢言而不涉於迂泛雜文多考據淹雅惟敘事閒用典稱地名



多只舉一字不無可議處

雲蘿茅屋詩鈔莆田郭宜璋著吉兩山房文集云雲蘿三姊年十有二學已淹貫工吟詠歸同安李氏爲忠毅公長庚家孫婦姊夫逢時襲爵未及入覲卒甥維實襲爵姊詩宗魏晉慨當以慷有爲而長言非無病而呻吟矣

觀海集一卷劉家謀著賭棋山莊文集云臺灣亂芑川力疾守陴病暑卒棺歸遇賊遺物盡失而此一卷者棄擲絕嶠浮沈風濤竭力求之久而復出毋亦有神靈呵護之耶

海音一卷劉家謀著賭棋山莊餘集云芑川好談掌故初任寧德訓導其詩曰東洋小草自寧調任臺之府學左齋其詩曰觀海集又有海音百首則病中所成於臺之利病尤詳臺士爲之刻板藏於學

秦川焚餘草六卷補遺一卷閩縣董平章著石遺室書錄云前有崇祀名宦祠錄秦安縣志自序謝章鉞序各一首後附刻墓志等一卷謝序云



君之詩自抒胸臆然於地方利弊及時事不厭再三此固風人之微旨  
以案平章字琴虞道光癸巳進士

臺吟史詩初編二十七卷閩縣劉萃奎著萃奎字薇卿道光十四年以  
拔貢舉鄉薦年已四十餘計偕之京道卒浦城之漁梁其詩依年編次  
始采蘭陔集終彤筆綴談集凡目二十二其師陳壽祺爲之序

盪水書塾詩文草叢筆各一册閩縣何則賢著耕邨姑留稿有序云道甫  
受業於陳惕園先生之門道光癸未在鼇峰隨陳恭甫先生繼從高兩  
舍人揣摩古文而得其繩墨文品雅馴叢筆則蒼萃羣言采摭異聞  
新窮此書未刻其孫子恪用新法油板寫印者則賢字道甫道光乙  
未舉人

雲悅山房偶存稿六卷侯官楊維屏著石遺室書錄云維屏字翠巖吧雲  
樓詩話謂其取格在義山山谷之間張亨甫懷人詩亦云玉溪婉擊詞  
仍豔山谷清雄語愛奇則以先生自謂素愛玉溪生近體詩讀山谷古



風覺與玉溪異貌同妍也實則位置妥貼中時復駘蕩自喜閩中一時同輩似無出其右者案維屏原籍連城簞子嘉慶乙未舉人

有不爲齋詩集有不爲齋文稿長樂劉建庚著西堂盟白齋詩人永標季子弟舅五人皆以文章名世西堂獨耽吟嗜飲捧檄粵東卒以此忤當事意罷官歸建庚道光乙未進士見道光通志

爭秋館詩鈔劉建庚著抑快軒文集云西堂天懷坦蕩而篤志得詩人之蘊是鈔詞章不求炫而識職風格不求似而入於古張亨甫集云西堂爲人亢爽磊砢與人交可其勞苦患難久而不變其發之爲詩如大山老林蒼堅疏奧氣骨偉然獨出

張亨甫全集建寧張際亮著石遺室書錄云此集詩文合刻詩視思伯子堂較少卷一至卷五爲散體文卷六爲駢體文以下爲詩駢文多近賦體散文循規蹈矩不作態以取悅亦時時勒得筆任尙有未刻文若干卷存劉焯甫先生家筆意較爲跳脫案際亮道光乙未舉人



思伯子堂詩集張際亮著課餘偶錄云蓋其臨終時所手定者去取當較他刻爲精刻於姚石甫廉訪之子慕庭大令時任江西之湖口石遺室書錄云先生幼孤伯兄來儀太學教之成立名其堂志不忘也後咸豐年間同邑孔寄吾重刻爲三十四卷又名張亨甫全集

松寥山人詩集張際亮著抑快軒文集云亨甫年十八梓其詩曰蠶繅集蓋善學太白兼古樂府余亟慕其才而又私憂其發露之早也又云余嘗問亨甫松寥山乃焦山一小阜耳子何取義而名之則曰是阜雖小而所託高所見者愈遠蓋焦山之勝也亨甫取以自策其可量也哉自序云編自嘉慶乙亥年十七始迄道光甲申凡六百首

南來詩錄張際亮著自序云往歲甲申嘗梓其詩六百首於福州其後戊子復梓其詩三百首於京師頃自大梁之粵東友人多索其舊刻無以應因復出道路閒所作百餘首付梓以省錄射鷹樓詩話云已刊詩有松寥山人集叟光堂集南來草諸集陳恭甫先生謂其七言古詩高青



邱後罕有其匹

翠眉亭稿一卷張際亮著石遺室書錄云稿中皆臺江狹邪遊之作署華胥大夫者寓言也後附碧雲遺稿妓女慕碧雲著

吉雨山房遺集十卷莆田郭錢齡著石遺室書錄云錢齡字子壽蘭石先生子內文四卷詩五卷詞一卷詩文皆時有新意文較透闢以頗究考據之學也

翁舍人遺稿福州翁惠農著伊園文鈔云吾鄉翁惠農先生以名孝廉出爲縣令歷湖北鄖陽諸任循聲卓然擢中書科中書王雁汀督部以經濟才薦之未行歿詩詞一以溫厚爲宗卽偶然賦物深情如見古文亦無非發揮其衷臆案佚其名

金粟如來詩龕集四卷福州翁時稊著石遺室文集云林歐齋布政著有榕陰談屑亟稱蕙卿之詩並稱遺稿藏於書樓樓火稿燼引爲至恨畏廬文集云先生晚年於詩益窳雖松寥之豪恣不可一世先生未嘗自



屈初師青蓮開出以昌谷之瀟灑余晤先生從孫仙孫上舍問副本存  
否出手定全稿魏禎甫司馬先生從子壻出資刊之

石室詩存閩縣王道徵著射鷹樓詩話云詩多質樸五言律尤爲集中之  
冠案字叔蘭諸生

綠天吟榭詩稿一卷侯官朱芳徽著石遺室書錄云芳徽字懿卿朱錫晉  
女適姜氏前有林鑑塘先生序詩意筆新穎語亦不佻

晚晴書屋詩鈔侯官莫友棠著道光通志云友棠字若愚道光閒布衣嗜  
酒耽吟任氣自負家貧課讀嘗以館穀所入奉寡嫂撫孤姪終身不娶  
早歲遊鰲峰山長鄭光策待以古學者

梅月山樓詩長樂劉近宸著張亨甫集云各體大抵才氣奔放自抒胸臆  
案近宸名佚存仁之兄

榕風樓詩存二卷浦城楊漢皋著石遺室書錄云漢皋字婉蕙爲梁茝林  
中丞第三子婦敬叔名恭辰妻詩筆頗纖弱



碧芸山房詩草邵武李春祺著抑快軒文集云蓋兼初晚二唐而香奩體尤工

留樸詩存二卷光澤伊光華著怡亭文集云留樸於詩期欲噓清吸潔引氣希微卒躋於峻極以適已爲尙案留樸縣學生

裘昫光遺詩光澤裘維祺著怡亭文集云昫光於詩確斲研練好之既篤則其進亦未可定者不幸未充其志而止於斯維祺縣學生卒年三十

一

希古堂文集十卷建寧熊際遇著賭棋山莊餘集云藕亭文亦私淑朱梅崖而導源於金芭汀芭汀者梅崖之高弟也故其文不悖義法而時露英爽然如高小翠傳竹夫人傳則在所必刪希古堂集末卷有讀論孟偶錄十餘則多穿穴得閒之言令人點首稱是其古文足以名家論記諸作尤工案字虞典縣學生

藕亭詩集熊際遇著抑快軒文集云其詩蕭疏淡遠如其爲人



徐質甫詩集十五卷建寧徐顯璋著抑快軒文集云豪邁閒遠以天趣勝  
寄情草建寧朱珊著怡亭文集云家甚貧常常閉門餓清坐無計但吟詩  
度日補郡學生授徒生平坎壈佗僚無一歲之獲安有妻操作甚力教  
其子且讀書意思蕭閒可喜詩格頗類賈島方干諸人與世不相入稱  
其爲人故好之者少也

朱守愚詩建寧朱守愚著閩遊詩話云少以高才爲名諸生壯年不遇貢  
於太學詩抒寫性情樸直近道有儲光羲元結之風

厚園遺集一卷文集八卷建寧吳淳著射鷹樓詩話云厚園茂才早歲潛  
於進取研言勵行動必師古文學昌黎其同里張亨甫詩才雄視一代  
自訂詩文全集則惟求厚園一序之

何鑑亭文集□□何鑑亭著張亨甫集云何先生鑑亭館於予里中因相  
識出所爲古文屬序詞奧義充不失法度

小石渠閣文集六卷侯官林昌彝著石遺室書錄云文似欲學汧容甫故



同舟答問數篇似仿廣陵對而以許書中與經傳異文者組織貫串成篇似蒙求似歌訣似三千字文餘如論謝安淝水之捷有成算而不明其北府之有劉牢之魏晉欺人孤寡取天下而僅責其風俗之不善論古未爲特識弔博羅韓烈女而信周生得其遺袴女憑焉真形畢見絕代豐姿太似說部之言案昌彝道光己亥舉人

儀識齋牘稿一册侯官沈葆楨著石遺室書錄云公生平不以文字見長奏議外罕有所作此卷爲公孫翊清所掇拾然其中如與周副貢書饒莊勇遺像題後皆有關時事之作案葆楨道光己亥舉人

伊園文鈔四卷閩縣王景賢著石遺室書錄云前有謝章铤序例之於謝退谷鄭六亭陳惕園諸人以爲皆師法朱子者今案集中時有關鄉邦舊事景賢字子希道光己亥舉人

愛竹齋詩草侯官王式金著賭棋山莊餘集云南鄉以教讀有名於時詩得性情之正而筆足以舉其氣氣清而詞達情深而文明懷藤吟館隨



筆云王南卿式金明經以詩一卷見不錄其擬聶夷中田家苦懷東臣  
南齊宮詞送治亭由山左之中州各云云案式金道光庚子優貢生  
不忘初齊詩草仙遊王紹燕著射鷹樓詩話云王貽穀大守詩高朗可誦  
案紹燕捷南子道光己亥舉人

補蕉山館詩二卷鄂跗草堂詩二卷三峰草廬詩二卷沁泉山館詩二卷  
柳湄小榭詩二卷侯官郭柏蒼著石遺室書錄云皆編年無序跋蓋道  
光癸未至光緒庚寅數十年之詩也詩中自注頗多鄉邦故事體格皆  
近白蘇案柏蒼字兼秋道光庚子舉人

段桐草堂集二卷續一卷郭柏蒼著石遺室書錄云中多福建掌故前三  
卷文續一卷筆記體裁

耕村姑留稿六卷永福余潛士著石遺室書錄云潛士字時續論史之作  
如四皓魯兩生道學儒林分傳等篇皆有特識解經之作如織文烏章  
袒裼襲亥有二首六身等篇皆有心得惟喜据偽古文尚書及偽孔傳



鄭周官之六年五服一朝仲虺之誥之錫王舅智湯誥之上帝降衷不一而足案潛士道光癸卯舉人

聽秋山館詩鈔十卷侯官林楓著石遺室書錄云謝枚如舍人序稱其晚年勤著述特精閩之地理掌故皆勒有成書詩學特其緒餘然存詩近千首必非無意爲之者矣其清漳雜詠客中雜述諸作可資掌故案楓字芾庭道光甲辰舉人

黃鵠山人詩鈔十八卷閩縣林壽圖著自序云水次之民間蓬萊可至習水性發船累年月蕩平大澤而無崖波濤震駭幾覆焉划而息清溪淺瀨忽萬濤雷動妄臆奇觀逆而上港斷舵折牽曳久之不能自挽陸處者笑之夫非不自悔也歲久荒其故居以水爲家矣石遺室詩話云少壯時濡染於松寥山人後自謂學山谷亦不盡然集中工力最肆者在由京兆尹外放以後詩鈔凡十八卷獨缺十一卷聞皆刺時之作故未梓然十三卷以下已在在而是矣案壽圖字穎叔道光乙巳進士



黃鵠山人遺文一卷林壽圖著馮煦跋云師之文紆餘卓犖得廬陵之神  
不爲鉤章棘句亦不爲叫囂矯厲岸然自標異以駭聾俗

繭窩遺詩三卷林壽圖繼室張印著石遺室書錄云夫人字月潭陝西潼  
關人以從夫之義志於福建藝文歐齋先生舉夫人誠子詩入榕陰談  
屑何振岱序則謂哀時感事之作言及政紀民生常有餘慨則非尋常  
婦人女子之詩矣

一燈書舍詩草光澤何秋濤著射鷹樓詩話云願船學問淹洽讀書過目  
成誦十三經疏及皇清經解皆能默記尤精輿地之學旁搜博采阜然  
成帙官部曹刑部例案爛熟於胸同寮驚以爲神案秋濤道光乙巳進  
士

咳南山館詩鈔四卷侯官魏秀仁著石遺室書錄云多遊晉遊秦遊蜀以  
及取道荆豫吳越之作緣情綺靡居其大半懷古思舊者次之是鈔前  
有己巳自序略云綺靡諸作有本事有寓言不能刪薙以存真也案秀



仁字子安道光丙午舉人

岷雲樓文鈔十二卷閩縣劉存仁著石遺室書錄云此集諸體文闕碑志傳狀書札居十五六多言事之作其上李鐵梅督學書牒陳恭甫先生修志五事條達允當補高兩農與鄭方伯王觀察書所未盡與王雁汀侍郎林穎叔方伯諸書真情迸溢苦語悽惻又先生自謂生平詩古文喜往復自道沈痛入情亦由自少至老備嘗艱苦鬱勃之氣藉此宣洩者矣案存仁字炯甫道光巳酉舉人

岷雲樓初集詩八卷二集詩四卷三集詩十二卷詞一卷劉存仁著石遺室書錄云詩妥帖排比皆乾嘉諸老舊法三集較勝

自怡山館偶存詩口口何芝軒著賭棋山莊文續集云少昂先生與章鉉從叔心來教諭爲同年生而先生獨以詩鳴交游往來閒時時聞先生章句以爲非吐棄凡猥者不及此

荃蘭集不著撰人道光通志云見刊行本校城香宮小史自序略曰情有



所觸輒形吟詠既非有爲而然亦非有託而逃雲房香史素仙氏序略  
曰小史栽花作骨借月爲神徐陵有筆架是珊瑚李白能文心皆錦繡  
又曰宜思隔世聽法於歡喜之園但願他生託根在菩提之樹

周莘仲廣文遺詩一卷侯官周長庚著石遺室書錄云前有林紆一序臺  
灣志彰化名宦一傳高鳳岐稿也詩學岑高時有警語長庚咸豐壬戌  
舉人官彰化教諭

陳惺齋雜文節錄一卷德化陳煦著課餘續錄云嘗徒步謁予漳州講院  
出所著書相質證所言皆經史犖犖大者集首有陳頌南侍御序道君  
生平甚詳案煦咸豐辛亥副舉人

冠悔堂駢體文鈔六卷晉江楊浚著石遺室書錄云浚本晉江人以侯官  
籍領鄉薦浚頗能記誦而駢文多用習見故實且極少虛字體格亦近  
律賦然視古近體詩則勝矣案浚字雪滄咸豐壬子舉人

冠悔堂詩鈔八卷楊浚著石遺室書錄云浚字雪滄以舉人援例爲內閣



中書又援例爲候補道員家開一舊書坊因饒藏本所有著述頗熟於鄉邦典故詩多至千數百首入其類於時

烏石山房詩存八卷閩縣龔易圖著石遺室書錄云方伯咸豐己未進士天才敏捷文字皆下筆立就詩近袁簡齋

烏石山房文鈔一冊龔易圖著石遺室書錄云此未刻本多條陳時事之作外惟自序讀宋雙駝園環碧池館淨名菴記銘等數篇而已未附楹聯數十對君素工此道也

梁禮堂文集閩縣梁鳴謙著賭棋山莊文集云禮堂捷南宮觀政考功既而歸尋爲當路羅致治官書以能名於時予偶一覩禮堂之所論議詳切不縛則心喜之而禮堂顧歎息歲月銷廢學無所就其所流露於詩歌亦咽咽有不自得之音案鳴謙咸豐己未進士

劍懷堂詩草四卷侯官宋謙著石遺室文集云已舟先生屢困公車值天下兵革往來戎馬寇盜間中更悼亡劍懷堂詩悽惻者追莘田牢落者



近亨甫案謙成豐已未舉人

林學士遺詩一卷長樂林天齡著石遺室書錄云錫三年丈成豐庚申進士雖與陳子駒楊豫庭諸人建南社然早入詞林授讀弘德殿歷典試差學差無暇以詩自鳴此卷乃其弟天從掇拾手鈔者近體多古體少悟蓮室文鈔一卷候官何嵩祺著南檐瑣錄云嵩祺字伯希成豐庚申進士官兵部主事撰著頗富嘗燬於火此卷乃其家後人鈔存者僅二十六首而在解論辨序傳記跋書札祭文行述各體略備論辨尤鑿心切理獨具眼識蓋人品清高故所作亦無凡響也

壯懷堂詩稿十卷候官林直著石遺室書錄云直字子隅湘颺廉訪紱之子曾隨宦遊四方官知府前有儀徵張集馨序林文忠公稱其近梅村謝村如稱其富與卣男檀河代興林薌溪謂與空同爲近林小銘齊韶謂君倡南社之會與者十三人爲楊叔惲仲愈浚陳通祺鏘馬凌霄郭式昌林齊韶天齡龔易圖黃經及君

詳壯懷堂詩注尚有一人未詳



筠書閣吟稿一卷後官楊秀珠著石遺室書錄云秀珠字碧如雪某光祿女適林解元廷琪早寡無子詩皆近體清秀無俗韻

吟香室詩草二卷續刻一卷金匱楊蘊輝著石遺室書錄云蘊輝字靜貞閩縣董平章之子婦楊蓉裳荔裳兩先生之姪孫女前有謝章铤許振禕廖廷相潘衍桐諸序謝序稱其詩綿芊溫麗猶是祖硯餘波殆實錄也

逸園詩鈔後鈔各四卷鼓山吟草五卷閩縣魏杰著石遺室書錄云杰慕風雅而不能文聞其詩皆倩人代作而時有說不去字句但集中多詳福州名勝姑錄之

春明課草無卷數閩縣陳翼著石遺室書錄云此同治辛未王申閒芭庭贊善供職部門與同人會課試帖約二百餘首分上下平韻排列之妥帖勻稱合於應試體裁故能屢得試差學差案翼同治癸亥進士

香堂詩稿一卷永福黃敬熙著石遺室書錄云敬熙字子穆同治甲子



舉人官四川安縣知縣里居與林畏廬周辛仲結詩社宗吳祭酒

隨庵遺稿四卷閩縣劉三才著謝章鋌序云君之所著大抵當時唱和之遺令子敬方搜羅叢殘勒爲一書蓋卽此四卷云案三才字壽之同治丁卯舉人

寫經齋詩稿四卷續稿一卷閩縣葉大莊著石遺室書錄云初稿損軒自刊專學樊榭頗長於幽尋喜用冷雋字冷僻典而閒近餽釘續稿才筆較流利自如係余代刊於武昌者大莊號損軒同治癸酉舉人

寫經齋文稿二卷葉大莊著石遺室書錄云損軒文頗質雅喜言禪悅體格在牧齋樊榭間

藤花吟館詩錄六卷晉江陳榮仁著石遺室書錄云集中長於金石考據之作若曾著有閩中金石略也前有同時人數序案字鐵香同治甲戌進士

王文學遺草晉江王晨暉著亦園陞牘云道義瘦弱善病偃蹇場屋年未



三十而歿生平于學無所不窺至其覃思苦吟幾于昌谷之嘔心鍊腎也

木庵先生詩三卷補遺一卷侯官陳書著石遺室文集云兄天才超逸無所師承獨自拔於閩派之外有詩二千餘首不專學一家晚年略與宛陵放翁誠齋爲近此集先刊六百餘首山谷精華錄之例也光緒乙亥舉人官博野縣知縣

良翁詩稿一冊侯官陳豫著石遺室詩話云兄亦乙亥舉於鄉所爲詩無慮數百首棄斥殆盡所存者屏南道中及淨名社降神唱和之作而已嘗與余石鼓聯句百韻一夜而成時兄假館劍池水木明瑟多雅集焉賭棋山莊文集七卷續集二卷又續集二卷長樂謝章鋌著復堂日記云文不分體以先後爲序亦雜有駢儷數篇枚如尙友東漢而文則浩浩自寫胸臆所謂放筆爲直幹也石遺室書錄云觀集中殘書目錄序大旨亦宗桐城姚氏說合性理考據詞章三者以爲文而益以經濟又與



陳叔毅書則云此際舉筆空無倚傍遠恥金華崑山不求其合近則桐城常州不知其派乘其機勢之所至卽韓子所謂懼其雜也亦不暇計及云云故其用成語用俗語吐棄閒有未盡歟章鉉字枚如光緒丁丑進士

賭棋山莊詩集十四卷謝章鉉著石遺室書錄云詩深於情喜山水遊嘗三登太華遊必有詩以出遊嶺南後爲勝遊秦遊贛爲更勝體格在張亨甫林歐齋之間江甌叔湜嘗勸以當學山谷謝不能從然詩實居古文詞長短句之右

賭棋山莊餘集四冊謝章鉉著石遺室書錄云首冊詩爲晚年回里後之作次三冊雜文四冊雜記首行標校閱餘話四字皆未刻本文與雜記中時有關掌故者

鷺江竹枝詞一卷閩縣蕭寶棻著課餘續錄云韻秋彙筆厦島適某觀察新任觀風以此命題韻秋試作四十餘篇名列第一後遂足成三百首



其初若虎藥鼠牙文蠹武蟲等篇皆列有名字觀察欲疎以捕治諸無賴洵懼將大與韻秋爲難韻秋不得已悉刪之詩雖體格未盡合而有關風土足備輶軒

漳州雜詩一卷龍溪曾虎文著課餘續錄云此丹芝書院門下士也予在漳州十年矣不知寅甫能詩豈非求之千里而失之目睫者乎因作四絕句題之其於地方積弊可謂詳哉其言矣

習軒詩鈔龍溪曾省著課餘續錄云曾醒翁性耽山水有閩中攬勝圖予爲作序又有習軒詩鈔筆意清轉

小蘭雪堂詩集十二卷同安王步蟾著石遺室書錄云君字桂庭同安廈門人光緒己卯舉人前有呂澂序及自序呂云嘗聞其論詩蓋導源靖節兼肆力於香山玉局者

畏廬詩存二卷閩縣林紆著石遺室詩話云畏廬余壬午同年自謂肆力爲文詩非所注意然吾謂詩較優勝少壯時爲吳駿公爲陳元孝未幾



盡棄斥不治此道者且三十年惟題畫則用小絕句雋脆可喜光緒季  
年余入都乃稍稍復爲之自謂專學東坡簡齋則遂亦東坡簡齋矣才  
人之能事如此惟既有謁陵詩又有贈段總理詩頗招詆譏

張文厚公文集四卷賦鈔二卷侯官張亨嘉著石遺室書錄二卷一經解  
對策卷二論說辨考卷三書後題跋卷四册文祭文奏摺說帖議告示  
記序紀實神道碑墓表墓志銘傳書壽序此集据吳曾祺前序于君彥  
跋爲曾祺所編定卷一二及賦鈔皆文厚考試致用正誼兩書院之作  
其詮次間有誤者如題平江吳氏兩世孝行紀實册乃書後題跋之類  
而名之曰紀實編諸神道碑墓表之閒高氏二節母墓志銘云節母姓  
凌氏江西彭澤人年十七歸同邑高利試而篇首云余內家弟高君軒  
舉自彭澤書來爲其大母母丐爲銘憶家居時父老往往道高氏二節  
母軼事游汲十餘年猶心識之念與高氏同里閉因緣葭葦不敢以不  
文辭則作墓志者明係彭澤人並非文厚何以編在此集然其文實文



厚手筆必文厚代他人作而能注代字也文厚文章根據經史尤熟與地之學惟散體時參駢語且閒用典與左海文略相似

聞妙香室遺集一卷侯官陳芷洲著附養碧齋詩一卷沈復著石遺室書錄云姊字仲容一名君悅十餘歲時與姊荇洲妹餘香同學詩文於伯兄有對影樓合稿既適沈氏家務蟬集此事遂廢詩工未深多思親之作文止一篇喪夫後所作行略言之甚悽惋復其少子字墨藻爲隨官中年卒詩筆雋爽

濤園詩集二册侯官沈瑜慶著石遺室書錄云集分正陽編春申編南州集義熙集濤園向少爲詩督鹽淮北始肆力吟詠匝月成一巨册往往有序序長於詩沈乙菴序所謂濤園之詩要當合其無韻之文字平生議論簡牘雜文互相證交相發而后意匠所經營乃視而可識也濤園光緒乙酉舉人官至貴州巡撫

林述菴遺詩一卷閩縣林崧祁著石遺室書錄云述菴城門鄉人光緒乙



西舉人林紆序云述菴辦香北地好爲高抗激楚之音顧亦不時作余謂述菴詩在儕輩亦一時之雄傑曾自哀一集百餘首爲同人竄取去今存者皆其散落未經修改之作

葉侍御詩鈔一卷開縣葉在琦著石遺室書錄云肖韓光緒丙戌進士詩筆清峭用思幽至蓋服膺於黃陳者惜不永年見其進未見其止也

夫菴文鈔四卷政和宋滋著著石遺室書錄云一二卷經解三卷史漢論說書後皆在會城致用書院應課之作大槩長於議論爲院長鄭虞臣先生所激賞第四卷雜文稍加刪節多可存者案滋著光緒丙戌進士繩武齋遺稿聞縣陳成侯著石遺室書錄云成侯字仲奮光緒己丑舉人此編皆其在致用書院課試之作考證諸篇時有心得論說筆意明簡惜降年不永未得見其工力所至耳

黛韻樓遺集八卷侯官薛紹徽著石遺室書錄云詩四卷文二卷多駢體詞一卷紹徽生平幼學手不釋卷腹笥有餘下筆暢達不求爲深微亦



不能指其似何人也紹徽孝廉海軍部陳壽彭室

陳刑部雜文一名閩縣陳寶璫著石遺室書錄云叔毅光緒庚寅進士言  
行服膺望溪治古文詞兼治經學而師事謝枚如先生文間近望溪亦  
多似枚如處此卷如亡女事略洪母張太宜人墓志銘贈內閣學士沈  
公墓志銘大學士南皮張公墓志銘諸篇皆精心結構之作餘多酬應  
壽文祭文及致用書院應課文

八家四六文注八卷侯官許貞幹著石遺室書錄云豫生少攻駢體文服  
膺卷施閣問字堂此注卷帙哀然而闕誤不尠余曾爲補正若干條勸  
其參入重刻余不居其名而遲遲未付梓坊間遂傳印行世矣

秋影菴詩一卷侯官王景著石遺室書錄云景字蘭生光緒辛卯舉人專  
學宋詩多近幽峭一路遊蜀所作時有筆力壯健者

晚翠軒詩一卷侯官林旭著石遺室文集云曠谷力學山谷後山寧艱辛  
勿流易寧可憎勿可鄙后山學杜其精者突過山谷然粗澀者往往不



類詩語瞰谷學后山每學此類在八音中多規敵少絲竹聽之使人寡  
懽遊淮北年餘所作數十首則淵雅有味迴非往日苦澀之境方滋爲  
瞰谷喜而瞰谷遂陷不測之禍矣案此集初刻於上海後商務印書館  
彙印爲戊戌六君子集李拔可爲印單行本

聽雨樓詩鈔一卷花韻集一卷詔安張繩武著石遺室書錄云繩武字績  
庭光緒癸巳舉人主嶺南揚陽鷗汀蓬鷗各書院講席四十而卒  
詩皆七言近體結想頗幽出筆頗秀花韻集率無題之作

山與樓詩文集五卷莆田林翰著石遺室書錄云翰字西園光緒壬寅舉  
人幼學嗜詩知性命初爲昌谷體玉溪生體入說詩社後捐去故技專  
爲瘦硬沈摯之詩今刪存數百首分內外集爲四卷文一卷雅健無一  
長語年未五十而卒惜哉

無辯齋詩一卷閩縣鄭容著石遺室書錄云容字國容布衣教授爲業足  
不出里門能有詩百十首足吟詠者亦已難矣陳駿菴鄭蘇龕皆稱之



黎吹閣詩草二卷侯官劉崧英著石遺室詩話云崧英字筱雲光緒癸卯舉人存詩始於遊蜀而晚歲益復秀美惟酬應之作稍多余嚴爲刪汰俾林立皆嘉木云

林天遺詩四卷閩縣林蒼著石遺室詩話云天遺詩千首近體居十之七八言窮愁者十之五六爲西湖而作者亦十之五六然不失其爲詩人之詩則真故也天遺光緒甲辰進士官江西知縣

碧琴子詩存一卷閩縣龔葆孌著南檐瑣錄云葆孌字子鳴又自號碧琴子寡交游蕭然一室左右圖史焚香默坐終日未嘗釋卷所作不規規一家而澹遠清摯自抒懷抱蓋其致遠也癸巳補弟子員戊戌病卒年僅二十八歲稿多不存此卷留予篋中者取而輯之以傳於世云

思易齋詩文集連江游萃著南檐瑣錄云萃立身清介平日精於星算之學有貞疾每年夏閒杜門謝客獨處一榻中閉目不語至秋乃如常所作多性情真摯之語五言古詩出入蘇陸間文不苟作所存只十數篇



翰雲草堂詩稿四卷永安黃梓庠著石遺室書錄云梓庠號淡菴光緒已  
酉拔貢生早卒羈旅感懷之作居多此稿雖分體作四卷然似未經刪  
定者

藹亭詩存一卷閩縣何善銘著荃庵詩話云善銘號藹亭予友心與從弟  
與予及碧琴善少多病而苦吟不輟吐音清冷引趣自遠雅近四靈惜  
早世未盡所詣也

寄生草詩稿福州邱潤仙著自娛齋文集云潤仙爲文學饒梅生室年二  
十頌所著寄生草三十餘首大抵皆感情之作澄麗婉脆視鏤刻花鳥  
詞濃意眩淺淺摹倣者不同

陳孝女遺詩二卷侯官陳芸著石遺室書錄云上卷詩下卷詞附芸壽彭  
女學詩詞於母意筆似較鮮新

小黛軒論詩詩一卷陳芸著石遺室書錄云專論明末及清朝婦女詩絕  
句二百餘首詩筆亦頗清穩